

PAVORO ITSIRINKAIGAKENERIRA IROMAKUNIRIRA

**Pavoro itsirinkaigakenerira
kematsaigatsirira timaigatsirira Iromaku**

1 ¹Maika nokogake nontsirinkaigakempira maganiro viroegi timaigatsirira kara Iromaku. Naro tenige nontimashitaemparo kogapage, intitari shintaana Jesokirishito, nopiriniwentavagetanakerotari magatiro ikogagetakerira irirori. Narotari ikogakagake Tasorintsi nompegakempira iritigankane Jesokirishito kameti intigankakenaniri nonkamantaigakerira maganiro tyara ikanta Tasorintsi yogavisaakotantira.

²Irorotari itsirinkakoigake kamantantaitatsirira pairani magatiro itsirinkakagaitakerira Tasorintsi ikantakera impogini intigankake Gavisaakotantatsirira irogavisaakoigakerira maganiro kematsaigakerineririra, ³intitari iniakotake Atinkami Jesokirishito, Itomi Tasorintsi poniankicharira enoku. Antari ipokutira aka savi imechotakera onti tomintakari iyashikitanakerira koveenkari Iravi. ⁴Antari ikamavetakara yoganiairi Tasorintsi, irorotari ogotantunkani inti Itomi, aikiro irogo ogotantunkani inti pairorira yagaveavageti, aikiro tera inkañovagetumatempa.

⁵Yogari Tasorintsi ikavintaavagetakena, irorotari ikogakagantakenarira Jesokirishito itigankakenara nonkenkitsatimoigakerira maganiro terira iriroegi jorioegi kameti intimagarantaigakeniri kematsai-

gakerineririra Tasorintsi intsatagaigakerora ikantakerira. ⁶Ario ikañotagaigakempira viroegi ikogakagaigakempira Tasorintsi irashintaigakempira Jesokirishito.

⁷Irorotari maika nontsirinkantaigakempira viroegi timaigatsirira kara Iromaku, itasanoigakempitari Tasorintsi aikiro ikogake pinkematsatasanoigakerira pimpaniroiganakerira irirori. Noniaventaigakempira inkavintaavageigakempira Apa Tasorintsi intiri Atinkami Jesokirishito intimakagaigakempira kameti ganiri tatoita povankinaventumaigaa.

Ikogavetaka Pavoro iriatakemera Iromaku

⁸Maika oketyo nokogake nonkamantaigakempira, tyarika noatake nokemakoigakempira viroegi pairora pikematsatasanovageigakeri Tasorintsi pitsotenkakovageiganakatyoka kara ikemakoitanakempira. Irorotari noniantakaririra Tasorintsi nokantakerira noshineventakari, irirotari kañotagakero maika Jesokirishito. ⁹Ineakenatari Tasorintsi omirinkatyoka noniaventaigimpira, panirotari irirori nopiriniwentavagetanakerira Itomi. ¹⁰Antari noniaventaigimpira nokantakeri Tasorintsi irirorika kogankitsine intigankakenara noatakera kara viroegiku noneaigakitempira, ¹¹nokogaketari nogotagaigakempira pashini yogotagakenarira Isure Tasorintsi kameti noshintsitagaigakempiniri ariompaniri pinkematsatasanoigakeri. ¹²Tera ario

nonkante paniro nogotagaigakempinaro, ontityo nokantake nokogake ashintsitagavakagaigakempara aroegi, ariotari atentagavakagaigari akematsaigira.

¹³Napigematsaegine, nonkamantaigakempi nopintsapintsavagevetakatyo noneaigakitempimera kantankicha teratyo nagavee nompokera ovashi maika. Onti nopintsatashinataka nonkenkitsatimoigutempira ariompaniri pinkematsatasanoiganakeri noneaigakempira pinkañoiganakemparira timageigatsirira parikotipageku nokenkitsatimoigakerira. ¹⁴Ikogakagakenatari Tasorintsi nonkenkitsatimoigakerira maganiro, intirika guriego intirika terira iriroegi guriego, intirika govageigatsirira intirika terira irogotumaige, noneaigakeritari ikogakoigakara inkenkitsatimoigakenkanira. ¹⁵Irorotari nokogantakarira nompokakera nonkenkitsatimoigakempira viroegi timaigatsirira kara Iromaku nonkamantaigakempira tyara ikanta Tasorintsi yogavisaakotantira.

Tyara ikanta yogavisaakotantira Tasorintsi

¹⁶Tera nompashiventagemparo nonkenkitsavagetakera nonkamantantakera tyara ikanta Tasorintsi yogavisaakotantira, nogotaketari irogavisaakoigakeri maganiro kematsaigakerinerira Jesokirishito. Iketyo ikenkitsatimoigunkani jorioegi impogini imaignunkani terira iriroegi jorioegi kameti irogavisaakoigakenkaniniri maganiro. ¹⁷Antari ikenkitsatokatunkanira Tasorintsi tyara ikanta yogavisaakotantira ogotanunkani tyara inkantaigakae ineaigakaera kañomataka tenirikatyo ankañovagetumaigempa. Intagani ineaigake kañoigaka maika yogaegi kematsaigakeririra Jesokirishito aikiro atanatsirira ikematsaiganakeri. Ariotari okantakeri Itsirinkakagantakerira Tasorin-

tsi okanti: “Yogari intagatirira ikematsakeri Tasorintsi ikantakera inkavintsaavagetakerira ineakeri irirori kañomataka tenirikatyo inkañovagetumatempa.”

Tasorintsi ikisashiigakari kañovageigacharira

¹⁸Yogari Tasorintsi timatsirira enoku ikisashitanotari maganiro kañovageigacharira vetsikagisevageigatsirira terira onkametite, tera inkogaigenika irogoigakera tatoita ikantake Tasorintsi, pairotari-tyo yavisaigake ishineventaigakarora yovetsikagisevageigirira. ¹⁹Iriroegi yogoigavetakatyo tyara ikanta Tasorintsi, tsikyatatari yogotagaigakeri irirori magatiro ikogagetakerira irogoigakera. ²⁰Aroegi tera aneaigavetempari Tasorintsi, kantankicha antari oneinkanira magatiro yovetsikaigakerira pairani okyasanokyara yovetsikake kipatsi ontiri aikiro magatiro timantagetarorira, ario pinkante ogotunkani inti Tasorintsisanorira pairorira yagaveavageti, nerotyo gara tyani kantumatatsi: “Narori tera nogote.” ²¹Yogoigavetakaniroro año Tasorintsi, kantankicha tera inkogaige inkematsaigakerira impinkatsaigakerira, aikiro ineaigavetakatyo ikavintsajaigakerira yovetsikimogeigakerira posante kantankicha teratyo inkogaige irishineventaigakemparira inkantaigakerira: “Pairo pikavintsaavagetakena”, ontitari isuregisevageiganaka posante, nerotyo tera irogotumaige. ²²Ikantaigavetakatyo: “Nogovageigi”, kantankicha teratyo irogotumaige. ²³Tera irishineventaigempari Tasorintsisanorira gaveavagetatsirira ikantakanirira itimi, inti ishineventaigaka ipegageigakerira itasorintsiegite yovetsikaigakerira iriroegi ikañotagaigakari matsigenka neirorira igamane intiri kapankiripage intiri kamarigetatsirira intiri aikiro marankepage. ²⁴Irorotari yapakuantaiganakaririra Tasorintsi irovetsikagisevageigakerora

tatarika ikogaigake iriroegi, tenige tyara inkantumaigaeri ovashi iposantegisevageiganaka iriroegi. ²⁵Teranika inkematsaigeri Tasorintsisanorira, intityo ishineventaigaka ipegageigirira itasorintsite kogapage. Onti yamatagavageigaka, teranika iri irishineventaigempa Tasorintsi vetsikakeririra ontityo ishineventaigaka yovetsikagetakerira. Kantankicha irirori inkantakanityo irishineventakenkani inkantakenkaira: "Pairo pikametiti." Ario onkañotakempa. Amen.

²⁶Irorotari yapakuantaiganakaririra Tasorintsi imposantegisevageiganakempara tenige tyara inkantumaigaeri. Ogari tsinaneegi tenige onkogaigae agaigaera surari, onti agavakagaiganaka apitsina neegitene. ²⁷Ario ikañoigaka surariegi tenige inkogaigae iragaigaera tsinane, onti yagavakagaiganaka irapisurariegitene opegakovageiganakerityo irogogeka. Tsikyatatyo ikañotagantaigaka iriroegi yatsiperekagavageigakara yovetsikagisevageigakerora posantepage terira onkametite gipashiventantagetatsirira.

²⁸Tera inkogaigenika isuretakoigemparrira Tasorintsi, irorotari yapakuantaiganakaririra isuregisevageigakemparrora posantepage irovetsikagisevageigakerora terira onkametite. ²⁹Onti ipiriniventaigake posantepage terira onkametite: yovetsikageigamatityo posantepage ovegagapage, ikogutaigakeri yashintaigearira pashini, yatsiperekagantavintaigaka, itsimaventavageigaka, yogantaigake, ikisavakagaigaka, yamativantavageigake, ikisantavageigake, aikiro iniashinaigakeri itovaireegi. ³⁰Itsoeventaigakeri pashini, ikisaigakeri Tasorintsi, pairo ipugatsatantavageiga, ineagaka pairo yavisantavageigake, yaventakoigakaro magatiro irogotane. Isuregisegeigamatatyos posantepage irovetsikagisevageigakera, tera inkematsavageigeri tomintaigaririra. ³¹Tera

inkogaige irogoigera, tera intsatagaigero ikantakerira, tera intantumaigempa, tera intsarogakagantumaigempa. ³²Yogoigavetakatyo ikantakera Tasorintsi tyanirika kañotankichane maika inkamanakerika iriatake morekariku kantankicha iriroegi teratyos inkemaige, ariompattyos ishintsiiganakera yovetsikagisevageiganakera posantepage terira onkametite. Tera patiro onake irovetsikagisevageigakerora iriroegi, ontityo aikiro ishineventaigakeri ineagakerira itovaireegi inkañoigakemparrira iriroegi irovetsikagisevageigakera posantepage terira onkametite.

Tasorintsi tera inkisashitantumatempa kogapage

2 ¹Pikonogagarantaigaka viroegi onti pikantaigake kametitake inkisashitasanoigakenkanira kañogirorira maika. Atsi gaigeratyos kavako. Antari pikantagakera maika vikirotyos kañotagantainkankicha, povetsikaigakerotari viroegi aikiro yovetsikaigakerira iriroegi. ¿Matsi tyara pinkantaigeri Tasorintsi ganiri ikisashiigimpi? ²Antari ikantira Tasorintsi inkisashitakemparrira kañogetirorira maika ogotasanotunkani onti yovetsikaigeigi terira onkametite, teranika inkisashitantumatempa Tasorintsi kogapage. ³Viroegiri pikantaigavetaka inkisashitakenkanira kañogetirorira maika, kantankicha akya pimaigavaka povetsikageiganakera kañopagerira yovetsikageigirira iriroegi. ¿Matsi tyara pinkantaigakempara ganiri ikisashiigimpi Tasorintsi? ⁴Impa ariorakari pineaigakerira ikantakanira ikavintsaantavageti, aikiro yatsiperekovageigakempira, pineagiri ariori gari ikisashiigimpi. ¿Matsi tera pogotumaige onti ikavintsaavageigakempi kameti pampakuaigakeroniri povetsikaigakerira terira onkametite pinkantatigaiganakempara? ⁵Kantanki-

cha tera pinkogaigenika pinkematsaigakerira Tasorintsi, aikiro tera pinkogaige pampakuaiganakerora povetsikageigirira terira onkametite kameti pinkantatigai-ganakempaniri. Ariompatyo pikañova-geiganakari tera pisuretumaigemparo impogini aganakempara inkisashitanta-kempara Tasorintsi pairotyo irogagava-geigakempi inkisashiigakempira, viroegi-takaniroro. Yogari Tasorintsi inkantasa-noigakeritari maganiro tyarika ikantaigaka. ⁶Irirori yogotasanotakero-tari yovetsikakerira paniropage inkantan-takemparira tyara inkantakenkani.

⁷Ikonogagarantaigaka matsigenka ikantakani inegintevageiga, ikogaigake-tari iriaigakera enoku irishineventaigava-kemparira Tasorintsi inkantaigavakerira: “Maikari maika pikematsatakenatari, taina pinkantakanira pintimake naroku pinkañotakenara naro noshimpokirren-kakera.” Maganiro kañoigacharira maika inkantaigakeri Tasorintsi inkantakanira intimaigake iriroku. ⁸Kantankicha pairotyo inkisashitanovageigakempari maganiro intagatirira ipiriniventaigi tatarika ikogaigakerira iriroegi, tera inkogaigenika inegintevageigakempara onti yovetsikageigi posantepage terira onkametite. ⁹Iriroegi iratsipereavageiga-ketyo kara inkenkisureavageigakempara. Iratsipereavageigaketyo maganiro iriroegirika jorioegi intirika terira iriroegi jorioegi maganirosanotyo iratsipereigake. ¹⁰Kantankicha yogari negintevageigacharira iriaigake enoku irishineventaigavakempari Tasorintsi inkantaigavakerira: “Maikari maika pikematsatakenatari, taina pinkantaka-nira pintimake naroku pinkañotakenara naro noshimpokirrenkakera, aikiro pintimagantsivagetakera kameti gara otimumatai veraakempinerira.” Ario inkañotagaigakeri maganiro irirorika jorioegi intirika terira iriroegi jorioegi.

¹¹Tasorintsi ineaigakeritari maganiro matsigenkaegi ario ikañovakagaigaka tera intime kantatigaigankichanerira.

¹²Maganiro kañovageigacharira inkisashiigakenkani. Yogaegiri terira iriroegi jorioegi teratyo irogoigavetem-paro itsirinkakotanakerira Moiseshi inkisashiigakenkanityo irirori aikiro, kantankicha ganirorotyo ikantaigiri Tasorintsi: “¿Tyara okantakara tera pintsatagaigero itsirinkakotanakerira Moiseshi?” Yogari jorioegi goigavetaka-rorira kantankicha atanatsi ikañovagei-gara iriro pinkante inkisashiigakempari-tyo Tasorintsi inkenkiagaviigakerira teranika intsatagaigero. ¹³Yogari Tasorintsi teranika iriro irishineventai-gempa intagatirira yogogiro itsirinkako-tanakerira Moiseshi, intityo ishineventai-gaka tsatagasanoigirorira. ¹⁴Yogari terira iriroegi jorioegi tera irogoigave-temparo itsirinkakotanakerira Moiseshi, kantankicha okonogaka inegintevagei-gaka ikañotagaigakaro otsirinkakotunka-nirira, tsikyatatyo yogotagashiigakaro iriroegi. ¹⁵Antari ikañoigakara maika ogotunkani yogogikero iriroegi tyarika inkantaigakempa inegintevageiganakem-para, intitari gotagaigakeri Tasorintsi, nerotyo omirinka yovetsikaigira tatarika oita terira onkametite yogotaketyo tera onkametite. Paniropage yogoti ariorika inegintevagetaka ontirika tera. ¹⁶Ario onkañotake maika impogini aganakem-para inkantantakemparirira Tasorintsi Jesokirishito inkisaigakerira maganiro manaigavetakarorira yovetsikageigake-rira terira onkametite. Ariotari nokanta-keri nokenkitsatakavagetakerora tyara ikanta Tasorintsi yogavisaakotantira.

**Yogari kematsatasanotiririra Tasorintsi
inti joriosanorira**

¹⁷Kantankicha viroegi pikantaigi: “Nantiegi jorioegi, garatyo ikisashitumai-

gana Tasorintsi, nogotasanoigiroteri itsirinkakotanakerira Moiseshi notsata-gaigakerora.” Ontiri aikiro paventakova-geigaka pineaigiri intaganiri viroegi itasanoiga Tasorintsi. ¹⁸Pineaigakanirika-tyo pogoigiro ikogirira Tasorintsi, aikiro pogoigiro tatoita kametitatsi ontiri aikiro tatoita terira onkametite. ¹⁹Aikiro pineaigakanirikatyo pairo pavisaigake pogovageigakera, nerotyoko pikogantaigakarira pogotagaigakerira terira irogotumaige. ²⁰Tsikyata pipegaiga gotagantai-gatsirira pineaigiri ariori pagaveaigake pogotagaigakerira terira irogotumaige intiegiri ikyaenkarira goiganankitsi, pineaigaketari pogotasanoigirora itsirinkakotanakerira Moiseshi, aikiro pineaigiri irorori gotagaigakempi pogovageigakerora magatiro tatapagerika oita ogovagetaganirira ontiri aikiro magatiro arisanorira. ²¹Inti pogotagaiganake pashini, ¿tyara okantakara tera pogotagaigaempa vikiro? Ario okañotaka pikantaigira: “Tera onkametite pinkoshitera”, iroroventi gametyo pikoshiigi viroegi. ²²Irorotari pikantagira aikiro: “Tera onkametite piatashiigerora tsinane”, gametyo piatashiigiro viroegi. Ario ikañotaka ipegageigirira itasorintsite kogapage, irorotari pineaigakerira tera inkametite, gametyo pikoshigetutaigiri yashintakagagetaganirira nagetatsirira ivankoku. ²³Paventakoigakaro pogoigirora itsirinkakotanakerira Moiseshi, kantankicha antari tera pintsatagaigero okantakerira onti pisamatsanagantaigakeri Tasorintsi. ²⁴Ariotari okantiri Itsirinkakagantakerira irirori okanti: “Yogaegiri terira iriroegi jorioegi iniashinaigari Tasorintsi, viroeginiroro kañotagantaigakeri.”

²⁵Viroegi jorioegi pineaigake garatsaigakavi pichonkirimeshinate pineaigiri ariori irishineventaigakempi Tasorintsi, kantankicha naro nonkantaigakempi

pintsatagaigakerorika magatiro itsirinkakotanakerira Moiseshi ario pinkante irishineventaviigakempironiroro pogaratsaigakara. Antari garika pintsatagaigero magatiro kañomataka tenirikatyo pogaratsaigempa. ²⁶Yogaegiri terira iriroegi jorioegi tera irogaratsaigavetenkani kantankicha antari katinkara irogaigakero irovetsikaigakera inkañotagaigakemparora ikogagetirira Tasorintsi, irirori ineigakeri kañomataka garatsaigakanirikatyo. ²⁷Iravisavageiganakempityo viroegi jorioegi garatsaigavetankicharira goigavetakarorira itsirinkakotanakerira Moiseshi, kantankicha tera pintsatagaigero. ²⁸Yogari intagatirira yogaratsaitunkani imeshinaku teratyoko iriro joriosanorira yashintasanotarira Tasorintsi, aikiro teratyoko irishineventempari Tasorintsi ineakerira yogaratsaitunkanira, tera intsatageronika ikogagetirira irirori. ²⁹Yogari kematsatsasanotiririra Tasorintsi, aikiro itsatagasanotakero ikantirira, iriro pinkante inti joriosanorira yashintasanotarira Tasorintsi, ikantatigasanotakatari isureku, tera iroro iraventempa yogaratsaitunkanira, teranika iroro kantatigakagerine itsatagirora itsirinkakotanakerira Moiseshi, intityo kantatigakagakerine Isure Tasorintsi. Yogari kañotirorira maika ishineventunkani, kantankicha tera iriro shineventaigemparine matsigenkaegi, intityo shineventakari Tasorintsi.

3 ¹Ariorika inkantaigake jorioegi: “Iroventi kogapage nokantaigake nantiegi jorioegi yashintasanogarira Tasorintsi, onti yogaratsaitakena kogapage.” ²iTeratyoko! Irirorogitari ikavintsaasanoigake Tasorintsi. Ogari pairorira avisagetakero magatiro onti itsirinkakagantaigakenerira Iriniane. ³Antari añorika terira inkematsaigeri Tasorintsi ¿tyarika ankantaige? ¿Ario ankantaigake inti tsoenti Tasorintsi?

¿Matsi ario oga inkenake inkantatigana-kempa ganige itsatagairo ikantakerira?

⁴iGaratyo! Intsoegageigavetakempatyo maganiro matsigenkaegi kantankicha Tasorintsi garatyo itsoegumata, intsata-gakeroty ikantakerira. Itsirinkakotana-keritari Iravi Tasorintsi ikanti:

“Ineaitakempi omirinka pikantasa-notake, tera pintsoeguma-tempa.

Inkantaivetakempityo tera intsata-gero ikantakerira

kantankicha viro pitsatagakeroty magatiro kameti pineakagaigakeriniri tera ario pamataguma-tempa.”

⁵⁻⁶Antari akanaigira irirori tera intsata-gero ikantirira, impogini itsatagakero, aroegi neakagaigakeri maganiro arisano ikantasanti tera iramatagumatempa. Iroroventi, ¿tyarika ankantaige maika? ¿Ario ankantaigake onti yovetsikake Tasorintsi terira onkametite ikisashiigajira ineigakaira tera ankematsaigeri? iGaratyo! (Ariotari ikañoigirori niashiigarorira kogapage.) Iroromera irovetsikake Tasorintsi terira onkametite, ¿ario tyaraty inkantakempara impogini inkisashiigakemparira maganiro kaño-veigacharira? ⁷¿Matsi ario okametitake nontsoegakempara nonkantakera: “Tera intsatagero Tasorintsi ikantirira”, impogini intsatagakerora ineakenkani inti pairorira itsatagageti magatiro ikantirira tera intsoegumatempa? iTeraty! Ariomera onkametitakeme maika, ¿ario tatatyo oitara inkisavita-kena Tasorintsi? ⁸Ariomera onkañota-keme, ¿tyara okantakara tera ankantaige: “Tsame avetsikaigakera terira onkametite kameti aneakagantaigakeriniri Tasorintsi tera inkañoavagetumatempa?” Ariotari ikantaigakeri kañoigakerorira maika iniashinaigakenara kogapage ikantaigi onti nogotaganti inkañoigakem-

para maika. Kametitaketyo inkisashiigakemparira Tasorintsi.

Maganiro aroegi akañoavageigaka

⁹Iroroventi maika ¿tyarika ankantaige? ¿Ario ankantaigake aroegi jorioegi paio avisaigakeri terira iriroegi jorioegi? iGaratyo akantumaigi! Maganirotari aroegi akañoavageigaka, ario ikañoigaka jorioegi intiegiri aikiro terira iriroegi jorioegi ikañoavageigaka. ¹⁰Ariotari okantakeri Itsirinkakagantakerira Tasorintsi okanti:

“iTera intimumatenika negintevage-
chanerira garira ikañoavagetu-
mata, intimumagetaketyo paniro!

¹¹Tera tyani gotumatatsine tyara ikanta Tasorintsi,

aikiro tera tyani kogumatatsine
irogotakera.

¹²Ikantaigavetakari Tasorintsi tyara inkantaigakempa inegintevageigakempara,

kantankicha teraty tyani kematsa-
tumateline.

iMaganirosanoty yaparaigaka
yovetsikaigakera terira
onkametite!

¹³Iniagisegeigamatityo posante
ovegagapagerira,
aikiro yamatavitantageigamatityo.
Iniashinaigakari itovaireegi
itsoeventanaigakarira,
yatsipereakagavageigakari.

¹⁴Omirinka ikisaigakeri itovaireegi
iniagisevageigake ikemakaga-
naigakarira.

¹⁵Ishineventaigakaro irogantavageiga-
kera.

¹⁶Tyarika inaigake yatsipereakagava-
geigakari pashini ikenkisurea-
kagavageigakari.

¹⁷Tera irogoige irishineigakempara,
aikiro tera irogoige kametikyara
iragavakagaigakempa intimai-
gakera kameti.

¹⁸ Teratyo impinkumaigero Tasorintsi.”

¹⁹ Aroegi agotasoigake magatiro itsirinkakagakeririra Tasorintsi Moiseshi intiegi itsirinkakagantaigakene iseraereegi kameti irogoigakeniri tera intsatagaigero magatiro ikogagetirira ganiri tyani ventakovagetacha inkantakera: “Naro notsatagakero magatiro, tera nonkañovagetumatempa.” Garatyo tyani gaveimatatsi irogavisaakotakempara tsikyata, maganirosanotyo inkisashiigakenkani. ²⁰ Garatyo tyani gaveimatatsi irogametiaerira Tasorintsi inkantakerira: “Naro notsatagakero magatiro pikogagetakerira viro.” Teranika iroro irogavisaa-kotantaigae Tasorintsi atsatagaigirora ikantirira. Ogari ikantirira intagati ogotagaigakai aneigakeniri aroegi antiegi kañovageigacharira.

**Ikantake Tasorintsi
irogavisaakoigakenkanira
kematsaigakerinerira Jesokirishito**

²¹ Kantankicha maika yogotagaigakai Tasorintsi tyara ikanta yogavisaakotan-tira. Irerotari itsirinkakoigake pairani Moiseshi intiegiri maganiro kamantan-taigatsirira. Tera ario inkantaige inti irogavisaakoigake tsatagaigirorira magatiro itsirinkakotanakerira Moiseshi. ²² Onti ikantaigake irogavisaakoigakerira maganiro kematsaigiririra Jesokirishito, irirorikara jorioegi intirika terira iriroegi jorioegi, ineaigakeritari maganiro imirinka ario ikañovakagaigaka tera inkantatigumaigempa. ²³ Ikañovageiga-katari maganiro, tera tyani tsatagumate-rone magatiro ikogagetirira Tasorintsi kameti irishineigakempariniri. ²⁴ Kantankicha irirori ikavintsaavageigakai itigankakerira Jesokirishito inkamaventaigakaera ovashi yogavisaakoiganakeri maganiro kematsaigakeririra. Aroegi teratyo tatoita avetsikaigumate kameti irogavisaakoigakaeniri, tsikyatatyo

ikogake irirori irogavisaakoigakaera.

²⁵ Pairani tekyara iripokute Jesokirishito ineaigavetakari Tasorintsi pairaninirira kañovageigamataka, kantankicha yatsipereakoigakari yogotaketari inkamaventaigakeri impogini Jesokirishito. Impogini tsikyatatyo itigankakeri iratsipereaventavageigakerira inkamaventaigakerira maganiro kañovageigacharira, irirori pugaigakerine inkamakera. Antari ikentakotunkanira ovoatanakera iriraa onti ganigeniri ikisashiigaari Tasorintsi kematsaigakerinerira Jesokirishito inkantaigakera: “Arisanoniroro ikamaventakena.” Ikogaketari Tasorintsi irogoigakera maganiro tera tyani irogavisaakotumate kogapage, aikiro tera tyani inkisashitumatempa kogapage. ²⁶ Ario okañotaka maika kameti agoigakeniri aroegi yogari Tasorintsi omirinka katinka yogakero. Antari yogavisaakoigirira kematsaigiririra Jesokirishito tera irogavisaakoigeri kogapage, ontitari ineaigakerira ikematsaigakerira, yogoigaketari ikamaventaigakerira.

Tatampatyo aventakovageigakempa

²⁷ Iroroventi ¿tatatyo oitara aventakoigakempara aroegi? ¡Tatampanirorotyó! ¿Matsi tyara okanta? Teranika ario irogavisaakoigae Tasorintsi ineaigakaira atsatagaigakerora magatiro ikantagetirira, ontityo ikavintsaaviigakai ineaigakaitari akematsaigakerira Jesokirishito. ²⁸ Irerotari nonkantantaigakempirira irogavisaakoigakerityo Tasorintsi maganiro kematsaigakerinerira Jesokirishito, ariorika itsatagakero itsirinkakotanakerira Moiseshi ontirika tera intsatagero.

²⁹ ¿Matsi intagani irogavisaakoigake Tasorintsi jorioegi? ¿Matsi gara yogavisaakoigiri aikiro terira iriroegi jorioegi? Irogavisaakoigakeriniroro aikiro iriroegi. ³⁰ Mameritari pashini

Tasorintsisanorira, panirosanotari ikantakara irirori^a ineaigakerira maganiro kematsaigakeririra Jesokirishito kañoigamataka tenirikatyo inkañovagetumaigempa, irirorikara jorioegi intirika terira irioegi jorioegi.
³¹Iroroventi akañoiganakerora maika akematsaigakerira Jesokirishito ¿ario apakuaiganakero tenige antsatagaigaero itsirinkakotanakerira Moisesi? iTeratyo! Ariompatyo ankañoiganakerori maika akyaenka tsatagasanoiganakerone.

Tyara ikantaka Averan

4 ¹Maika onti nokogake nosuretagai-gaempirira Averan yashikitasanoiganakairira aroegi jorioegi. ¿Tyara ikantaka irirori? ²Irorome irishinevitakemparime Tasorintsi Averan tatarika oita yovetsika-getakerira iraventakovagetakempamero-rokari, kantankicha ineakeri Tasorintsi mameri tatampatyo iraventakotakempa.
³Pogoigakerorokari tyara okanti Itsirinkakagantakerira Tasorintsi pairani. Onti okanti: “Yogari Averan ikematsatakeri Tasorintsi, neroty ineanakariirira kañomataka tenirikatyo inkañovagetumatempa.”^b ⁴Onti okañotakaro oka, tyanirika tavagetatsi, impogini ipunata-vunkani tera inkantenkani: “Onti nopashitakempiri kogapage”, ontitari ipunavitunkani yantavagetakera.

⁵Kantankicha intimera pashini gara tatoita yantumati kameti irogavisaakota-kenkaniniri onti inkantake: “Nogotasa-noti yogari Tasorintsi yogavisaakotiri kañovageigacharira”, ario pinkante irogavisaakotakeri ineakeritari ikematsa-takerira. ⁶Ario ikañotaka Iravi pairani ikantake ishinevagetaka tyanirika ineakerira Tasorintsi kañomataka tenirikatyo inkañovagetumatempa, teranika tatoita irovetsikumate irirori

kameti inkañotagakeriniri maika, ontityo tsikyata ikavintsaakeri. ⁷Impo ikanti:

“Ishinevageigakatyo maganiro imagisantakoigakerira Tasorintsi ikañovageigakara tenige inkenkiimataero!

⁸ ¡Ishinevageigakatyo yogaegi terira inkenkiagumaigeri Tasorintsi yovetsikaigakerira terira onkametite!”

⁹Yogari Iravi, ¿intaganirorokari iniakoi-ganake yogaratsaiigunkanirira ichonkiri-meshinate intirika iniakoigake aikiro terira irogaratsaiigenkani? Atsi sureigem-pariratyo Averan. Pine irirori ikematsatuma-takerira Tasorintsi ikantakerira inkavintsaavagetakerira, irorotari ineanakariirira kañomataka tenirikatyo inkañovagetumatempa. ¹⁰Kantankicha ¿tyati ineanakari Tasorintsi kañomataka tenirikatyo inkañovagetumatempa? ¿Ario ineakeri impogini ogaratsaitunkanira ichonkirimeshinate ontirika ineakeri tekyara irogaratsaitenkani? Teraty ario ineeri impogini yogaratsaitunkanira, ontityo ineakeri tekyara irogaratsaitenkani. ¹¹Yogari Averan oketyotari ikematsatakeri Tasorintsi ikantakerira inkavintsaavagetakerira, impogini yogaratsaitunkani ogotantakenkaniniri mataka ineakeri Tasorintsi kañomataka tenirikatyo inkañovagetumatempa, ikematsatakeritari.^c Irorotari ikantantaganirira yashikiiganakeririra maganiro kematsaigatsirira terira irogaratsaiigenkani. Ariotari ikañotagaigakari Tasorintsi irioegi aikiro ineaigakerira kañomataka tenirikatyo inkañovagetumaigempa.
¹²Arisanoniroro Averan inti yashikiigana-keririra aikiro maganiro yogaratsaiigunkanirira, kantankicha tera iroro intagati yogaratsaiigunkanira ontityo ikañoigakarira irirori Averan ikematsatakera

yogotakera intsatagakero Tasorintsi ikantakeririra. Ariotari ikañotari maika tekyara ogaratsaitenkani ichonkirimeshi-nate.

**Tasorintsi itsatagagetakero ikantakeririra
Averan ikematsatakeritari**

¹³Yogari Tasorintsi ikantakeri Averan impogini impakerira magatiro kipatsi irashintakemparora irirori intiegiri aikiro iyashikiiganakerira,^d kantankicha tera ario inkanteri maika ineakerira itsatagakerora itsirinkakotanakerira Moiseshi, tekyatanika ontimenika. Ontityo ikantakeri ineakerira ikematsatakerira ikantakerira inkavintsaavagetakerira intovaiganakera iyashikiiganakerira.

¹⁴Antari intaganimera shintaigakemparone magatiro kipatsi yogaegi tsatagaigirorira itsirinkakotanakerira Moiseshi, çario tatatyo inkematsaviigakeri Tasorintsi yogaegi terira intsatagaigero?, gatanika yashintaigaro iriroegi ikashigakagakaririra Tasorintsi Averan ineakerira ikematsatakerira. ¹⁵Yogari goigavetakarorira ikantagetirira Tasorintsi ontsatagakenkanira kantankicha tera intsatagaigero inkisashiigakemparityo. Antari gamera ogotumatagani ario pinkante tyampaniroro onkantakenkani ontsatagakenkanira, teranika ogotumatenkani, gamerorokari tyani kañotagantacha.

¹⁶Iroventi maika, tsikyatatari ikogake Tasorintsi inkavintsaavagetakerira Averan intiegiri aikiro iyashikiiganakerira, ikantakeri ario inkañotakero maika. Kantankicha antari ikantakerira inkavintsaavageigakerira iyashikiiganakerira tera intagani iriniakoige iyashikiiganakerira tsatagaigakeronerira Itsirinkakotanakerira Moiseshi. Intityo iniakoigake aikiro maganiro kematsaigakerineririra inkañoigakemparira Averan

ikematsatakerira ikantakerira inkavintsaavagetakerira. Irorotari ipegantakerira irirori yashikiiganakeririra maganiro kematsaigatsirira. ¹⁷Ariotari okantakeri Itsirinkakagantakerira Tasorintsi okanti: “Nompegakagakempi yashikiiganakeririra tovaini matsigenkaegi.”^e Intitari kantankitsi Tasorintsi ineakerira Averan ikematsatakerira. Irirori intitari ganiaigirira kamageigavetacharira, aikiro itimakagagetiro posantepage tekyarira ontimumagete.

¹⁸Antari ikantakerira Tasorintsi Averan impegakagakerira yashikiiganakeririra tovaini matsigenkaegi, atake yagatavagetanaa, tekyanka intomintumatempa. Tyampatyora imponiaigakempara iyashikiiganakerira. Kantankicha irirori ikematsatakerityo Tasorintsi yogiakotakatyo intsatagakero ikantakeririra, ikantakeritari: “Intovai-gavageiganaketyo kara piyashikiiganakerira.”^f ¹⁹Yogari Averan panikya irishiriagakotanaempa 100 ineaka irirori teratyto maani irantarivagete kara, tyampatyto inkantakempara intomintakempara.^g Ario okañotaka itsinanetsite irorori atake antarotasano-vagetanai tera ontomintumatempa, kantankicha yogari Averan ariompatyo ikematsatanotanakeri. ²⁰Tera inkantumate: “Ariorikaratyo intsatagakero Tasorintsi ikantakenarira.” Ontityo ariompa ikematsatanotanakeri, aikiro ariompatyo ishineventasanotanakariri ikanti: “Pairo yagaveavageti Tasorintsi.”^h ²¹Yogotasantaketari tera onkomutapitsatumatempari intsatagakero ikantakerira, yagaveavagetitari. ²²Irorotari ineantakaririra Tasorintsi Averan kañomatata tenirikatyo inkañovagety-matempa. ²³Kantankicha tera intagani intsirinkakotenkani Averan ineakerira

kañomataka maika. ²⁴Itsirinkakoigakaityo aikiro aroegi, ineaigakaitari kañomataka tenirikatyo ankañovageigempa akematsaigakeritari irirori, irirotari ganiairirira Atinkami Jesokirishito ikitavetunkanira. ²⁵Yogari Atinkami irirotari itigankakerira Tasorintsi inkamaventaigakaera ganiri ikisaviigairo akañovageigara. Impogini ikamakra yoganiairi kameti ineaigakaeniri kañomataka tenirikatyo ankañovageigempa.

Tasorintsi ineaigakai kañomataka tenirikatyo ankañovagetumaigempa

5 ¹Maikari maika mataka ineaigakaitasorintsi kañomataka tenirikatyo ankañovagetumaigempa, ineaigakaitari akematsaigakerira ikantakera irogavisaa-koigakerira maganiro kematsaigakerinerira Jesokirishito. Neroty maika tenige ampinkaigaeri inkisashiigakaera onti ashinevageigaka, irirotari kañotagakero maika Atinkami Jesokirishito. ²Irirotari kamaventaigakai, neroty ikantakani ikavintsaavageigakai Tasorintsi ineaigakaitari akematsaigakerira. Ashinevageigakatyo kara agiakoigaka impogini ankañoiganakemparira irirori. ³Kantankicha tera patiro onake oka. Aikiro ashinevageigakatyo atsipereavageigakera, agotasanoigaketari antsipereavageigakerika irorotari agotantaigana-kempa kameti agaveaigakeniri ashintsi-tashivageiganakerora posantepage ariompatyo ankematsatasanoiganakeriri. ⁴Antari ashintsitashivageiganakerorika atsipereavageigakera ogotakenkani arisano opaitaka akematsatasanoigakera ovashi agiakoiganakempa ankañoiganakemparira irirori impogini. ⁵Kantankicha gara onti agiakoiga kogapage. Aifñotari itimasurentaigakai Isure Tasorintsi, irirotari gotagaigakai itasano-vageigakaira Tasorintsi.

⁶Pairani aroegi teranika agoige tyampaty ankantaigakempara agavisaa-koigakempara, kantankicha impogini agamatanakatyo ikamaventaigakaira Kirishito maganiro aroegi kañovageigacharira. ⁷¿Matsi tyanimpatyora kogankitsine impimantakemparora igamane impugakerira irapimatsigenkatene inkamakera ganiri iriro kamatsi? Kañotari intimera paniro negintevageta-charira garorokarityo tyani kogumatatsi impugakerira. Impatyo intimera pairorari ikavintsaantavageti irirorakari inkamaventakenkani. ⁸Kantankicha Kirishito ikamaventaigakai aroegi maganiro kañovageigacharira tekyae-nkara ankantatigumaigempa, irorotari agotantaigakarira itasano-vageigakai Tasorintsi. ⁹Antari ikamaventaigakaira Jesokirishito ovoatanake iriraa, irorotari ineantaigakairira Tasorintsi kañoigamata-kai tenirikatyo ankañovagetumai-gempa. Kañotari maika ineaigakaira kañoigamata-kai tenirikatyo ankañovagetumaigempa iroromparorokari irogavisaakoigakaera Kirishito ganiri ikisashigajai Tasorintsi impogini, paio irogavisaakoigakae. ¹⁰Pairani tera ashineigavetempari Tasorintsi. Ario ikañotaka irirori tera irishineigavetajae aroegi, kantankicha impogini itigankakeri Itomi inkamaventaigakaera kameti ashinevakagaiganakempaniri. Kañotari maika ashinevakagaiganakara iroromparorokari irogavisaakoigakaera, paio irogavisaakotasanoigakae, ikantakanitari itimi. ¹¹Tera patiro oka, yogishineigakaityo Tasorintsi aikiro, irirotari kañotagagetakero maika Atinkami Jesokirishito kamaventaigakairira kameti irishineigajaera Tasorintsi.

Aran intiri Kirishito

¹²Pairani panirosanoty matsigenka kañovagetankicha ovashi ikantakeri

Tasorintsi ineakerora igamane.^h Irorotari ikamantaigarira maganiro matsigenkaegi ontitari kantakagaigakeri ikañovageigara. ¹³Pairani tekyara intsirinkakotero Moiseshi magatiro ikantakerira Tasorintsi mataka kañovageigaka maganiro matsigenkaegi, kantankicha tera inkante Tasorintsi: “Tera intsatagaigero nokanterira, nonkenkiagaigakerityo impogini.” Tekyatanika intsirinkakaganteronika. ¹⁴Yogaegiri matsigenkaegi iyashikiiganakerira Aran maganiro ikañovageigaka, kantankicha tera inkañotasanoigaempari Aran okyasano-kyara ikañovagetakara.ⁱ Kantanakani-roro ikañovagakara maika kigonkero intsirinkakotakerora Moiseshi ikantakerira Tasorintsi. Antari ikañovagetakara Aran iroro oponiantaka ineantaigakarorira maganiro igamane, kantankicha yogari pokutatsirira impogini onti ikamaventaigakitiri maganiro kameti irogavisaakoigakenkaniniri.

¹⁵Panirosanotyo ikañovagevetaka Aran ovashi ineaignakero igamane maganiro matsigenkaegi, kantankicha Tasorintsi pairotyo ikavintsaavageigakai niganki avisavagetanakero ikañovagetakara Aran gamagaigavetakairira. Itigankantakaririra Jesokirishito inkamaventaigakaera. Impogini ipokuti irirori ario ikañotakero maika ikavintsaavageigakai ikamaventaigakaira yogavisaakoi-gakerira tovaini matsigenkaegi ariompainiri inkavintsaavageiganakeriri.

¹⁶Okyara panirosanotyo Aran ikañovagetakara ovashi ineantaiganakaririra Tasorintsi maganiro kañovageigaka, kantankicha pairotyo ikavintsaavageigakeri kañovageigankicharira vetsikageigirorira posantepage terira onkametite, ineigakeri kañomataka tenirikatyo inkañovagetumaigempa.

¹⁷Okyara panirosanotyo ikañovagetakara Aran ovashi ineantaiganakarorira maganiro igamane tyampatyo inkantagaempa inkantakanira intimaigae. Kantankicha impogini panirosanotyo ikamaventaigakai Jesokirishito ovashi ikavintsaavageigakai Tasorintsi imagisantakoigakaira magatiro avetsika-geigakerira terira onkametite, ineigakakai kañomataka tenirikatyo ankañovagetumaigempa. Kañotari ikañotakerora maika ikavintsaavageigakerira maganiro kematsaigakeririra, iroromparorokari iragaveakagaigakerira ganiri yovashiga-koiganaka avisaiganakerira tatapagerika oita paio iragaveakagaigakeri, ontiri aikiro intentaigakempairira impogini iriroku inkantakanira intimimoigakerira Jesokirishito inkañovagetumaigempairira irirori. ¹⁸Ikañovagetakatari panirosano Aran ovashi ineantaiganakarorira maganiro-sano igamane. Ario okañotaka impogini panirosano Jesokirishito ikamaventaigakerira maganiro kameti ineigakeriniri Tasorintsi kañomataka tenirikatyo inkañovagetumaigempa impo inkantakanira intimaigake. ¹⁹Panirosanotyo ikantakara Aran tera inkematsateri Tasorintsi ovashi ikañovagetantaiganakarira maganiro matsigenkaegi. Ario okañotaka aikiro panirosanotyo ikantakara Jesokirishito ikematsavagerira Tasorintsi ineantaigunkanirira tovaini kañomataka tenirikatyo inkañovagetumaigempa.

²⁰Pairani Tasorintsi ikantakeri Moiseshi intsirinkakerora magatiro ikantagetakeririra kameti irogoiganakeniri iseraereegi onti ikañovageiganaka, teranika intsatagaigero ikogagetakerira irirori, kantankicha antari atanatsira ikañovageiganaka ariompatyo ikavintsaasanovageiganakeriri Tasorin-

tsi avisavagetanaketyo kara. ²¹Ario okañotaka maika kameti inkavintsaaveigikaeniri aroegi aikiro. Antari ikañovagetakara Aran irorotari aneantaiganakarorira agamane, kantan-kicha maika itigankakerira Tasorintsi Atinkami Jesokirishito inkamaventaigakaera, ineiaigakai kañomataka tenirikatyo ankañovagetumaigempa, irorotari yoganiaitaigakairira asureku kameti ankantakaniniri antimaigake.

Okamapitsatunkanira kañovagetagantsi

6 ¹Irovento ÷tyarika ankantaige maika? ÷Ario atanatsi ankañovageigempara kameti inkavintsaasanovageigikaeniri Tasorintsi? ²¡Garatyó! Pine igamaga ikamumatakera tera ario atanatsi inkañovagetempara, matakatar kamake. Ario akañoigaka aroegi aikiro akematsatumaigakrira Kirishito kañomataka ontinirikatyo akamapitsaigakero kañovagetagantsi, ¿ario tyara ankantaigakempara atanatsira ankañovageigempara? ³Pogoigirorari tyara okantakara agiviaigara. Antari agiviaigara onti ogotakenkanira atake atentagaiganakari Jesokirishito, nerotyo ikamakera irirori kañomataka ontinirikatyo akamaigake aroegi. ⁴Antari ikamakera Jesokirishito ikitavetunkani. Ario okañotaka agiviaigara aroegi onti okantakotake ikitavetunkanira pairani, kañomataka ontinirikatyo atentagaigakari akitaigakara, kantankicha impogini yoganiairi Tasorintsi gaveavagetatsirira. Ario okañotaka aikiro akonteiganairia niaku kañomataka ontinirikatyo atentagaiganakari ikitareanaara kameti ankantagaiganakempaniri ganigera akañoigaa tekyara ankematsaige.

⁵Matakatar atentagaigakaritari Kirishito akamaigakera akañoigakarira irirori, ariotyo ankañoigakempari aikiro yoganiairira Tasorintsi, ankantatigaiganakempara ganigeniri akañoigaa tekyara

ankematsaige. ⁶Maika agotasanoigake antari ikentakotunkanira Kirishito kañomataka ontinirikatyo atentagaiganakari akentakoiagakara aroegi akamapitsaigakerora kañovagetagantsi ganigeniri atanatsi akañovageigara, ⁷kañoigamatakaitari igamaga tyampa inkantaempa inkañovagetaempara, kamaketari.

⁸Maika matakatar atentagaigakari Kirishito akamaigakera agoigaketyo atentagaigakarira aniaiganaira akantatigaiganaka tenige ankañoigaa tekyara ankematsaige. ⁹Agotasanoigaketari yaniimatanaira Kirishito ikamavetakara garatyó ikamumatai aikiro, yagaveasano-takerotari kamagantsi. ¹⁰Akañovageigakatari aroegi maganiro, irorotari ikamantakarira Kirishito. Ikamumatakera patiro matakaniro. Maika añaño ikantakani itimi onti ipiriniventavageti magatiro ikogagetirira Tasorintsi. ¹¹Maika ario pinkañoigake viroegi pogoiganakeratyó onti pikañoigakari irirori, tenigetari agaveaigaempi kañovagetagantsi, kañomataka ontinirikatyo pikamapitsaigakero. Añañoty pitimaigaveta kantankicha onti pitimashiigai pimpiriniventavageigakeroniri ikogagetirira Tasorintsi, pitentasanoigakaritari Jesokirishito.

¹²Irorotari maika nonkantantaigakempirira tsikyanira agaveaigimpikari kañovagetagantsi ovashi pameniaiganakempara povetsikagisevageiganakerora pikogageigakerira. ¹³Antari tekyara pinkematsaige onti pipiriniventavageigaveta povetsikageigirora posantepage terira onkametite, kantankicha ganigetyo pikañoigairo maika. Onti pimpiriniventaiganake pintsatagaigakerora magatiro ikogagetirira Tasorintsi, kañoigamatakavitari ontinirikatyo pikamapitsaigakero kañovagetagantsi, impo paniaiganai kameti pinkantatigaiganakempaniri. ¹⁴Ganigetari agaveai-

gaimpi kañovagetagantsi, tenigenika iroro pimpomirintsiventaigempa pintsatagaigakerora ikantagetirira Tasorintsi ontsatagagetakenkanira ganiri ikisaviigimpiro pikañovageigara. Tsikyatatari ikavintsaavageigakempi irirori.

**Tyara ikanta piriniventirorira
kañovagetagantsi intiri piriniventirorira
ikogagetirira Tasorintsi**

¹⁵Iroventi ñtyarika ankantaige aroegi maika?, aneagaketari ikavintsaavageigakaira Tasorintsi, ñmatsi ario atanatsi ankañovageigempara tenigetari inkantaigajae antsatagaiganakerora magatiro ikantagetirira pairani ontsatagakenkanira? iGaratyo akañotumaigiro maika! ¹⁶Viroegi pogoigitari intimera paniro matsigenka tsikyatara impimantakempa irashintakenkanira inkematsavagetakerira shintakemparineririra impo irashintumatakemparira kantakanityo inkañotakera maika, ñmatsi tyara inkantaempa iriataera parikoti intimashitaemparora kogapage? iGaratyo yagaveimati! Ario pikañogaka viroegi maika irororika pishineventaigakempa pinkañoovageigakempara ariompatyo agaveaiganakempiri ovashi pinkamaigake piaigakera morekariku. iTyampaty pinkantaigaempa pampakuaiganaerora! Antari irororika pishineventaigakempa pinkematsaigakerira Tasorintsi ario pinkante ariompatyo ishintsitagaiganakempiri kameti pinegintevageiganakempaniri. ¹⁷⁻¹⁸Ario pikañogaveta viroegi tekyara pinkematsaige onti pikañovageigaveta, tyampaty pinkantaigakempa pampakuimaigakerora. Kantankicha impogini yogotagaitakempira tyara pinkantaigakempa pinkematsaigakerira Tasorintsi pishineventaigavakarora ovashi pikañoiganaka maika. Impo yapakuakagumaigakempi-

rora Tasorintsi pikañovageigakara irorokya pipiriniventaiganake pinegintevageiganakara pitimagantsivageiganakera kameti. Maikari maika noshineventasanovagetakarityo Tasorintsi kara, irirotari gaveakagaigakempi pikañotantaigakarorira maika. ¹⁹(Onti noniakogetanake pineageigirira viroegi kameti pinkemaigakeniri tatoita nokantake, noneaketari garika nokañotiro maika onti onkomutapitsaigakempi.) Ariotari pikañogakari tekyara pinkematsaige onti pipiriniventaigaveta povetsikagisevageigirora posante terira onkametite, arioty pinkañoigakempa maika pimpiriniventaigakeroty pinegintevageiganakempara pintimagantsivageiganakera kameti, ompote pimpanirotasanoiganakeriniri Tasorintsi, iri pinkematsasnovageiganake.

²⁰Antari tekyara irapakuakagaigempiro Tasorintsi povetsikagisevageigavetakarira, teratyo pagaveimaige pinegintevageigakempara. ²¹Antari pikañogavetakara maika, ñmatsi tyara okantaigakempi? ñMatsi okantakani ogishineaigakempi gipashiventaiganakempirira maika? iTeraty! Teranika oganiantumate kañopagerira maika, ontityo oataganti morekariku. ²²Kantankicha maika mataka yapakuakagaigakempiro Tasorintsi povetsikagisevageigavetakarira terira onkametite, irorokya pipiriniventaiganake pikematsasnovageiganakerira. Maikari maika ario pinkante negintevageiganakavi, impogini piaigake itimira Tsorintsi pinkantakani pintimaigake. ²³Maganirotari kañovageigacharira inkamaiganakerika iriaigake morekariku, kantankicha yogaegiri kematsaigiririra Atinkami Jesokirishito inkavintsaavageigakeri Tasorintsi iriaigakera enoku inkantakanira intimaigake, garatyo ineimaigairo igamane.

**Kematsaigatsirira onti
ikañoigakaro ogamakotaga**

7 ¹Napigematsaegine, atsi gaige kavako. Viroegi pogoigiroitari tyara okanta magatiro okantavitantagetagani-rira. Intaganitari ikantavitagani tekyarira inkame. Antari inkamumata-naera ario pinkante ganigetyo ikantavi-getaagani, kamaketari. ²Pine okantanta-ganirira ogari tsinane suraritakotsirira tera onkametite okerira ojime tekyara inkame agaera pashini. Antari ogara inkamanae ario pinkante ganigeniroro okantavitaagani. ³Kantankicha antari añaokyarika intime ojime impo okanakeri agaera pashini, ario pinkante onti ovetsikake terira onkametite. Antari ontirika inkamake ojime ario pinkante tatampaty onkantavitakenkani, kameti-taketyo agaera pashini, gara okantagani ovetsikake terira onkametite.

⁴Irorotari maika, napigematsaegine, viroegi kañoigamatakavi ontinirikatyo pikamapitsaigakero itsirinkakotanakerira Moiseshi, pitentagaigakarira Kirishito ikamakera kameti irashintasanoigakempiniri, irirotari kitareanaacharira ikitavetunkanira. Ario okañotaka maika kameti pintsatagasanoigakeroniri ikogagetirira Tasorintsi. ⁵Antari tekyara ankematsaige onti apiriniventaigaveta avetsikageigirora tatarika oita akogageigakerira aroegi. Antari ogotunkanira okantavitantagetunkanira pairotyo akogasanoganake avetsikageigakera posantepage terira onkametite, atanatsime ankañoigempara maika aigakemetoy morekariku. ⁶Kantankicha maikari maika kañomataka ontinirika akamapitsaigakero itsirinkakotanakerira Moiseshi kantaviigavetakairorira posante terira onkametite. Maika onti apiriniventaiganake atsatagaigakerora

magatiro ikogagetirira Tasorintsi. Tera iroro kañotakagaigaene otsirinkakotunkanirira, intityo kantatigakagaigakai Isure Tasorintsi.

Ashiegitari agaigakero akañovageigara

⁷Iroroventi, ÷tyarika ankantaige maika? ÷Matsi ario ankantaigake tera onkametite itsirinkakotanakerira Moiseshi? iGaratyo! Antari gamera nogotiro tyara okanti, ario pinkante gamerorokari nogoti onti nokañovage-taka. Pine gamera okanti: “Gara pikogutantiro yashintagetarira pashini”,^j gametyo nogoti tera onkametite nonkogutakerira. ⁸Maikari maika nogotakerora irorotari okenantanaka nokogasanotanakera novetsikasanogetanakera posante terira onkametite namenianakarora, nashitari nogakero nakyara nokañovagetara. Antari gamera agoigi okantavitantaganira posante gametyo akogasanoigi avetsikageigakerora, kantankicha agoigakerora okantavitantunkanira ovashi akogasanoganake avetsikageiganakerora posante terira onkametite. ⁹Pairani tekyara nogotasano-tero itsirinkakotanakerira Moiseshi mameri tatampa vankinaakagavagetakenane, tera nogotenika onti nokañovage-taka, kantankicha impogini nogotasano-tanakerora nogotasananomatanaketyo onti nokañovagetaka ovashi nokenkisureava-getanaka, nogotanaketari inkisashitakenara Tasorintsi impogini. ¹⁰Pairani Tasorintsi itsirinkakagakeritari Moiseshi magatiro ikantakerira ontsatagakenkanira kameti intimagantsivageigakeniri maganiro tsatagaigakeronerira, kantankicha narori noneakero iroroty okenantakarira inkisashitakenara Tasorintsi impogini, teranika nontsatagagetero magatiro. ¹¹Irore nogotasananakerora

itsirinkakotanakerira Moiseshi, tera noshineventemparo nontsatagakerora, ontityo noshineventanakaro magatiro okantavitantunkanirira iroroty novetsikagetake. Irorotari nogotantakarira onti inkisashitakena Tasorintsi, nakiirotari kañotagantankicha. ¹²Kantankicha agoigake ogari itsirinkakotanakerira Moiseshi paio okametiti, ontitari itsirinkakotake ikantagetakakerira Tasorintsi, aikiro ogotagaigakai anegintevageigakempara.

¹³Iroventi maika ÷tyarika nonkante? ÷Matsi ario nonkantake onti kañovagetakena itsirinkakotanakerira Moiseshi inkisashitantakenarira Tasorintsi? ¡Garatyo nokanti! Nakiiroty kañotagantankicha, nashitari nogakero naro nokañovagetakara. Nogovetakarotari ikantakerira Tasorintsi kantankicha onti okenantanakaro novetsikanakera okantavitantunkanirira. Iroroniroro ogotantunkani pairora navisake nokañovagetakara. ¹⁴Agoigaketari inti Isure Tasorintsi tsirinkakagakeri Moiseshi magatiro ikantakerira Tasorintsi kameti agoigakeniri anegintevageigakempara, kantankicha naro teratyo nagavee nontsatagakerora, nashitari nogakero nokañovagetakara. ¹⁵¡Tyarikara nokantakara naro! Nokogavetakaty nontsatagakerora ikantakerira Tasorintsi, kantankicha teratyo nagavee. Ontityo novetsikanake terira nonkogavetemparo novetsikakerora. ¹⁶Antari novetsikira terira nonkogavetemparo novetsikakerora nogotake onti novetsikake terira onkametite, irorotari ogotantunkanirira paio okametiti itsirinkakotanakerira Moiseshi, okantavitantakerotari novetsikakerira. ¹⁷Narori teratyo nonkogavetempa nonkañovagetakempara, kantankicha kantakanatari nokañovagetara irorotari nokañovagetakantakarira. ¹⁸Nogotaketari ario nokantaka naro tera

nagaveimate nonegintevagetakempara. Nokogavetakaty nonegintevagetakempara, kantankicha teratyo nagavee.

¹⁹Nokogavetakaty nontsatagakerora ikogagetirira Tasorintsi, kantankicha teratyo nagavee. Ontityo novetsikanake terira onkametite terira nonkogavetempa naro novetsikakera. ²⁰Iroventi ÷tyara nokantakara novetsikakerora terira nonkogavetempa novetsikerora? Ariotari nokantakari naro nokañovagetakara.

²¹Arioniroro nokañotakari maika. Nokogagevetakatyo novetsikakera kametiri nonegintevagetakempaniri, kantankicha teratyo nagavee, ontityo novetsikanai terira onkametite. ²²Noshineventavetakaroty magatiro ikantagetakakerira Tasorintsi, nokogavetakaty nontsatagasanotakerora. ²³Kantankicha noneaka tera nagavee, kantakanatari naro nokañovagetakara, neroty tyampa nonkantakempa nontsatagetakakerora. ²⁴⁻²⁵Irorotari nokogantavetakarira nontsatagetakakerora magatiro ikantagetakakerira Tasorintsi, kantankicha teratyo nagavee, kantakanatari nokañovagetakara. ¡Tyarikaty nonkantanakempa naro! ¡Tyanimpatyo gaveakagakenane nampakuagetanakerora magatiro kañovagetagakenarira ganiri ikisashitana Tasorintsi impogini! Panirosanoty gaveakagakenane Atinkami Jesokirishito, irirotari kamaventakenarira. ¡Irorotari maika noshineventavagetakarioty Tasorintsi kara!

Tyara ikantaiga itimasurentaigakerira Isure Tasorintsi

8 ¹Maikari maika yogaegiri kematsaigakeririra Jesokirishito ganige ikisashiigaari Tasorintsi. ²Pairani onti avetsikagisevageigavetaka posante terira onkametite, tyampaty ankantaigakempa ampakuaiganaerora, inkisashiiga-kaemetyo Tasorintsi. Kantankicha impo

akematsaigakerira Jesokirishito yogari Isure Tasorintsi yoganiaigakai asureku, yagaveakagaigakai akantatigaiganakara tenigera ankañoigaempa pairani.

³Iroromera ontsatagakenkani itsirinkakotanakerira Moiseshi gametyo tyani gavisaaokutumatacha, teranika tyani gaveatsine intsatagasanotakerora magatiro. Irorotari itigankantakaririra Tasorintsi Itomi inkamaventaigakaera. Irirori ikañotasanoiiganakai aroegi kantankicha tera inkañoavagetumatempa neroty yagaveantakarira ikamaventaigakaira. Antari ikamaventaigakaira ikisavitakeri Tasorintsi akañoavageigara ganiri aroegi ikisaviigajairo impogini. ⁴Ikañotakero maika kameti agaveaigakeniri antsatagasanoiigakerora magatiro ikantakerira Tasorintsi, tenigetari iroro ampiriniventaigae avetsikageigaera tatarika oita akogageigirira aroegi, ontityo apiriniventaiganake ikogagetakerira Isure Tasorintsi.

⁵Yogaegiri piriniventaigirorira yovetsikageigira tatarika oita ikogaigake iriroegi intagatityo ipiriniventaigi, kantankicha yogaegiri piriniventaigirorira ikogagetirira Isure Tasorintsi ontityo isuretaogeta irashipage Tasorintsi. ⁶Yogaegiri piriniventaigirorira ikogageigirira iriroegi inkisashiigakemparityo Tasorintsi impogini inkamaiganaera iriaigakera morekariku. Kantankicha yogaegiri piriniventaigirorira ikogagetirira Isure Tasorintsi iroganiaigakenkani isureku ganigera ipinkaigairi inkisashiigakemparira Tasorintsi. Impogini inkamaiganaera iriaigake enoku itimira Tasorintsi.

⁷Yogaegiri maganiro piriniventaigirorira ikogageigirira iriroegi intiegi kisashiigairirira Tasorintsi. Tera intsatagageigero ikantakerira, aikiro garaty yagaveimaigi intsatagaigakerora. ⁸Tyampatyo inkantagakempa iriroegi irogishineaigakerira Tasorintsi. iTeratyo iragaveaigae!

⁹Kantankicha viroegi tera iroro pimpiriniventaige pikogageigirira viroegi, ontityo pipiriniventaigi ikogagetirira Isure Tasorintsi timasurentaigakempirira. Tyanirika terira intimasurenti Isure Tasorintsi itigankakerira Kirishito tera iroro shintemparine Kirishito. ¹⁰Pashitari pogaigakero okyara pikañoavageigakara, irorotari pikamantaigarira pimirinkaegi. Kantankicha maika aifnotari itimasurentaigakempi Kirishito, yogari Tasorintsi yoganiaigakempi pisureku kameti pinkantakaniniri pintimaigake, ineigakempitari kañomataka tenirikatyo pinkañoavagetumai-gempa. ¹¹Itimasurentaigakempitari Isure ganiairirira Jesokirishito ikamaventaigakaira, impo ariotyo inkañotagaigakempi viroegi aikiro pinkamaigavetakempatyo iroganiaigaempityo.

¹²Napigematsaegine, irorotari maika panirosanoty irirori ankematsaigake ganigera iroro apiriniventaigai tatarika oita akogageigirira aroegi. ¹³Antari pimpiriniventaigakerorika tatarika oita pikogageigirira inkisashiigakempityo Tasorintsi piaigakera morekariku, kantankicha pinkematsaigakeririka Isure Tasorintsi irapakuakagaigakempiro magatiro povetsikageigakerira terira onkametite, impogini piaigake enoku pinkantakani pintimaigake gara pineimaigairo pigamane.

¹⁴Maganirotari tsatagaigakerorira ikantaigakeririra Isure Tasorintsi iniasurentaigakerira intiegitari itomiegi Tasorintsi. ¹⁵Yogari Isure Tasorintsi timasurentaigakempirira tera iroro intimasurentashiigempi iromintsarogai-gakempira pinkañoigaempara tekyara pinkematsaigeri Tasorintsi pipinkasanoi-girira inkisashiigakempira. Ontityo itimasurentashiigakempi impegakagai-gakempira itomiegi Tasorintsi, neroty aniaigirira Tasorintsi akantantaigairirira:

“iApa!” ¹⁶Iniasurentaigakaitari Isure Tasorintsi agotantaigakarira antiegi itomiegi Tasorintsi. ¹⁷Aikiro agotantai-gakarira impaigakaero Tasorintsi magatiro ishinetagaigakairira, kantankicha intaganivati kogakotasantankicha antsipereagakera ankañoigakemparira Kirishito yatsipereavagetakera kameti ankañoigakempariniri irirori impogini, antentagaigakemparira ashintaigakemparora magatiro yashintagetarira irirori.

Impogini ankañotasanoigakempari Kirishito

¹⁸Arisanotyo nonkantaigakempi pairoty ashinevageigakempa impogini aigakera enoku aneaigakerira Kirishito ankañoigakemparira, avisavagetakero-tyo magatiro atsipereavageigakerira maika. ¹⁹Magatiro yovetsikagetakerira Tasorintsi giaigamataketyo agakempara ineantaigakenkanirira itomiegi Tasorintsi inkantatigaiganakempara inkañoigakemparira tentaigakemparineririra.

²⁰Antari okyasanokeyara yovetsikagetake Tasorintsi magatiro kametitavagetaketyo onagevetaka, teraty ario onkañogevempa maika, kantankicha antari ikañoavagetakara Aran okantatigagetanaka, kantankicha teraty tsikyata onkantatigagetempa irorori, intityo kantatigakagagetakero Tasorintsi.^k Irerotari okamantagetanunkanirira ovesegagetanunkanirira tenige onkusogamanegetaenkani. Ario ikañoigaka aikiro maganiro niagetatsirira imirinka ikamaigi, kantankicha Tasorintsi ikantake ²¹garatyo ikantakani ikañoiga maika, intentagaiganakemparitari maganiro itomiegi Tasorintsi inkantatigaiganakempara. Ario okañogetakempa magatiro yovetsikagetakerira aikiro, ganigetari otimumatai terira onkametite.

²²Agotasanoigaketari magatiro yovetsikagetakerira Tasorintsi atsipereake ogiakera onkantatiganakempara, kañomatakaty atsipereavagetira tsinane okatsimonkitira. ²³Kantankicha tera patiro tsi pereatsine yovetsikagetakerira Tasorintsi, atsipereavageigaketyo aroegi aikiro. Itimasurentaigakai Isure Tasorintsi agotantaigakarira inkantatigakagaigaera Tasorintsi impogini, kantankicha maika aïñokya avankinaventavageigaro agiakoi-gakarora impaigakaerora Tasorintsi ishinetagaigakaririra maganiro itomiegi. Ankamaigavetakempaty kantankicha iroganiaigakae inkantatigakagasanoigakaera ganiri aneaigairo agamane. ²⁴Antari akyara kematsaigakeri Kirishito agoigake impogini ankantatigasanoiganakempa ganiri aneaigairo agamane, irerotari agiaigake maika. Kantankicha ariome aneaigakerome maika ishinetagaigakairira Tasorintsi gamerorokari agiakoi-ga, matakatar aneaigakero. ¿Matsi atanatsi agiakoi-gempara? iGaratyo! ²⁵Kantankicha irororika agiakoi-gake tekyarira aneaigero maika negintekyatyo agiakoi-gakero antsipereakovageigakemparora magatiro.

Iniaventaigakai Isure Tasorintsi

²⁶Ario okañota aikiro garika ashintsi-tashigeigiro posantepage pokashigeigajairira yogari Isure Tasorintsi irimutakoigakae ishintsitagaigakaera. Aroegi aniaigirira Tasorintsi tera agoigenika tyarika ankantaigeri, kantankicha intagatirika aniasurentumaigakempa maani iriniaventaigakae Isure Tasorintsi. ²⁷Yogari Isure Tasorintsi yogotitari tatoita ikogageti Tasorintsi neasurentaigiririra maganiro, neroty iniaventaigirira kematsaigatsirira katinkatyo yoganaïro, irerotari yogotantavaarira Tasorintsi tatoita ikogake inkantakerira.

**Garatyo tyani gaveimatatsi
inkañotagantaigakaera**

²⁸Agoigake magatiro tatapagerika oita posantepage gishineaigajairira ontirika kenkisureakagaigajairira, iroro ishintsita-gantaigari Tasorintsi isureku maganiro tasanogairirira. Irroegitari isariaigakairira pairani irashintaigakempairira impo iniasurentaigakeri kameti inkematsaigakeriniri. ²⁹Pairani yogotaketyo Tasorintsi tyani kematsaigakerine, nerotyto ikogakagantaigakaririra inkañotasanogakempairira Itomi. Irirori impegaigakeri irirentiegi intovaigavageigaketyo kara.

³⁰Yogaegiri ikogakagaigakerira inkañotasanogakempairira Itomi iniasurentaigakeri kameti inkematsaigakeriniri. Antari ikematsaigakerira onti ineaigakeri kañomataka tenirikatyo inkañovagetumaigempa impo ikañotagaigakari Itomi.

³¹Iroroventi maika ishineigakaitari Tasorintsi itentaigakaira, ñmatsi tyanimpatyora gaveaigakaene? iGaratyo tyani gaveimatatsi! ³²Tasorintsi tera intsaneapitsaigajaeri Itomi, ontityo itigankakeri inkamaventaigakaera. Kañotari itigankakerira Itomi inkamaventaigakaera akyari itigankiri, iroromparorokari impaigakae-rora posantepage kametiripage pairo impaigakaero. ³³Aroegi igantaga isariaigakaira Tasorintsi irashintaigakaera. Maika mataka yashintaigakai. ñMatsi tyanimpatyora kantaigakaene aiñokya akañovageiga? iGaratyo tyani gaveimatatsi ikantaigaira! Irirrotari Tasorintsi neaigakai kañomataka tenirikatyo ankañovagetumaigempa, ñmatsi tyanimpatyora gaveankitsine inkañotagantaigakaera inkisashiigakaera Tasorintsi? ³⁴iGaratyo tyani gaveimata-tsi! Irirrotari Kirishito kamaventaigakai. Tera patiro inkamaventaigae, ontityo ikitareanaa aikiro, maika aiño ipirinitai inampinaku Tasorintsi irakosanoriraku

iniaventaigakaira. ³⁵ñMatsi tyanimpatyora gaveankitsine irapakuakagakerira Kirishito ganigera itasanogajai ikavintsaigakaira? iGaratyo tyani gaveimatatsi! Antsipereavageigavetakempatyo ontirika ankenkisureavageigakempa, kantankicha yogari Kirishito inkantakanityo intasanogakae inkavintsaavageigakaera. Ontirika iratsipereaka-gaigakae pashini inkisaigakaera kogapage, ontirika antsipereavageigake atasegane. Ariorika gara otimi tatampa agaguigakempa, ontirika ontimagetake posante koveenkagetankitsinerira, aikiro ankamaigavetanaempatyo kantankicha yogari Kirishito inkantakanityo intasanogakae inkavintsaavageigakaera. ³⁶Okantaketari Itsirinkakagantakerira Tasorintsi okanti:

“Omirinkatyto ikogaigake irogaigakenara ineaigakenara nokematsaigakempira.

Ikañotagavageigakenatyto ovisha panikyirira irovetisakenkani.”

³⁷Nerotyto antsipereageigavetakempatyto kañopagerira oka kantankicha yagaveakagaigakaitari Kirishito tasanogakairira ariompatyoto ashintsitashigeiganakerori magatiro ganiri ovashigakoiganakai agaveaiganakaera posantepage. ³⁸⁻³⁹Irorotari maika naro nogotasannotake garatyto tyani gaveimatatsi irapakuakagakerira Tasorintsi ganigera itasanogajai inkavintsaavageigajaira. Garatyto yagaveimaigi isankariite Tasorintsi. Ario ikañogika kamagarinipage intiegiri tyanirika pashini koveenkari-page, garatyto yagaveimaigi. Ariorika ankamaigavetakempa ontirika aiñokyara aniaige, inkantakanityo intasanogakae. Ario okañotaka aikiro garatyto agaveimati ampakuakagakerira magatiro maikatirira ontiri impogigetankitsinerira. Ario okañotaka aikiro timatsirira enoku ontirika savitirira ontirika

tatarika oita pashini yovetsikagetakerira Tasorintsi garatyo agaveimati, itasanoi-gakaitari aroegi maganiro kematsaigake-ririra Atinkami Jesokirishito.

Tasorintsi ikogakagaigakeri iseraereegi inkavintsaavageigakerira

9 ¹Naro nanti kematsatiririra Kirishito aikiro itimasurentakena Isure Tasorintsi. Irero gikoneatimotakena tyara nokantaka nosureku, irorotari nogotantakarira magatiro nonkantaiga-kempirira maika onti arisano gara ario notsoega kogapage. ²Omirinkatyo nokenkisureavagetaka kara panikyatyo agavagetanakena, ³nokogavetakatari nompugaigakerira napijorioegitene nashisano notovaireegi kameti naroniri inkisashitakempa Tasorintsi, iriroegikya irogavisaakoigake, aikiro naro irovashi-gantakempa Kirishito, irirokyaniri intasanoigakempa inkavintsaavageigake-rira. ⁴Yogaegiri notovaireegi iyashikiiganakerira Iseraere intiegitari isariaigakera Tasorintsi pairani impegaigakerira itomiegi. Iriroegitari itentaigaka pairani, neroty ineaantaigakaririra ishipokire-renkakera kantamatake porererere. Aikiro iriroegi ikantaigake Tasorintsi inkematsaigakeririka inkavintsaavageigakeri. Itsirinkakagantaigakeneri magatiro ikogagetakerira intsatagaigake-rora. Aikiro yogotagakeri Moiseshi tyara inkantaigakempa anta ivankoku. Impo ikamantaigakeri aikiro tyara inkantaigakeri inkavintsaavageigakerira. ⁵Iriroegi intiegitari iyashikiiganakerira Averan, Isaako, Jakovo intiegiro itomiegi. Impogini itigankakerira Tasorintsi Kirishito imechotakera aka kipatsiku, ario ikañotaka irirori aikiro, iriroegi yashikiiganakeri. Irirori inti Tasorintsisanorira shintagetarorira magatiro. iKante

inkantakanira irishineventavagetaken-kani! Ario onkañotakempa. Amen.

⁶Irovoventi ÷tyara ankantaigake maika? ÷Matsi ario ankantaigake onti yamatavinaigakeri Tasorintsi iseraereegi, teranika intsatagero ikantaigakeririra pairani? Teratyo iramatavinaigeri, ontitari kantankicha antari ikantakera inkavintsaavageigakerira, tera iriro iriniakoige maganiro iyashikiiganakerira Iseraere, intagani iniakoigake iseraereegi ikogakagaigakerira irashintasanoigakemparira. ⁷Ario ikañotagaigakari pairani iyashikiiganakerira Averan iniakoigakerira Tasorintsi tera iriniakoigeri maganiro, irorotari ikantantakaririra Averan: “Irirotari pitomi Isaako yashikiiganakerine maganiro inkantagakenkanirira intiegi iyashikiiganakerira Averan.”^l ⁸Irorotari agotantaigakarira Tasorintsi teratyo impegaigeri iseraereegisanorira maganiro ⁹iyashikiiganakerira Averan. Intaganityo pegasanoigankicha iyashikiiganakerira Isaako, irirotari ikantakerira Tasorintsi pairani iniakerira Averan ikantiri: “Panivati shiriagarini ontomintakempa Sara.”^m

¹⁰Kantankicha tera patiro onake oka. Impogini yantaritanakera Isaako yagakero Ireveka impo itimake otyomiani yapiteanintaka. ¹¹⁻¹³Antari tekyara omechoigeri yogari Tasorintsi ikantakero: “Yogari iyashikitakerira iromperatakempari itsitiki.”ⁿ Antari ikantakerora Tasorintsi tekyanaka ompanivatumate irovetsikumaigera tatapagerika oita, tekyatanika omechoigerinika. Ariotari okantakeri Itsirinkakagantakerira Tasorintsi okanti: “Pairoty notasanovagetakari Jakovo, yogari Esao tesakonaty nontasanotempari.” Irorotari ogotantunkani magatiro oka tsikyata ikantake Tasorintsi irirori tyani

intsarogakagakempa inkavintsaavageta-kerira impo itsatagakeroty magatiro ikantakerira. Tera ario oketyo ineaigeri tatarika yovetsikaigake impo inkantake.

¹⁴Iroventi étyarika ankantaige maika? éMatsi ario ankantaigake onti yovetsikake Tasorintsi terira onkame-tite? íGaratyo! ¹⁵Ikantakeritari Moiseshi pairani ikanti:

“Tyanirika nonintake naro nontsaro-gakagakemparira nontsarogaka-gakemparityo.

Aikiro tyanirika nonintake nonka-vintsaavagetakera nonkavintsaavagetakeryo.”^o

¹⁶Irorotari maika tera ario intsarogaka-gaigae ineaigakaira tsikyatara akogaigake aroegi intsarogakagaigakaera apankina-navageigaka avetsikaigakera kameti, tsikyatatyo ikogake irirori intsarogakagai-gakaera, irorotari itsarogakagantaigakairira. ¹⁷Otsirinkakotunkani aikiro ikantakerira Tasorintsi igoveenkariegite Ejipitokunirira ikanti: “Onti nopegakagakempi koveenkari kameti vironiri ogotantankenani nagaveavagetira kameti inkemakoigakenaniri maganiro matsigen-kaegi.” ¹⁸Arioniro ikañota Tasorintsi maika. Itsarogakagari tyanirika ikogake intsarogakagakemparira, aikiro tyanirika ikogake imegakagakemparira terira inkeme kañomataka tenirikatyo ontime isure, arioty ikañotagakeri.

¹⁹Kantankicha aiñorika paniro kantake-nanerira: “Iroventi, ariora okañotaka maika étyara okantakara ikisashiigakairira Tasorintsi terira inkematsaigeri? éMatsi tyanimpatyora gaveankitsine inkantatigakerora ikantakerira Tasorintsi?” ²⁰éMatsi tyanimpatyora viro kameti pimpugatsakemparira Tasorintsi? Pine koviti kipatsinaki ovetsikaganirira, ématsi ario onkantakeri vetsikakerorira: “éAntari

gara pikañotagana maika povetsikake-nara?” ²¹Yogari vetsikakerorira irirotari shintakemparone, kametitaketyo irovetsikakerora tatarika ikogake irirori. Ariorika ikogake inegintetasanotakerora inegintetasanotakeroty, ontirika ikogake irovetsikakera pashini gasakonara inegintetasanotiro, gasakonaty inegintetasanotiro.

²²Ario ikañota Tasorintsi irirori ikogavetakatari inkisashiigakemparimera maganiro tsimajaigakeririra pogereaigankichanerira ineakagaigakerira maganiro tyara ikanta irirori ikisara, aikiro pairora yagaveavageti, kantankicha teratyo inkisashiigempari shintsi, ontityo yatsipereakovageigakari. ²³Onti ikañotaka maika kameti ineakenkaniniri paio ikavintsaantavageti, ikavintsaavageigakaitari aroegi igantagatari isariaigakaira pairani inkavintsaavageigakaera kameti ankañoigakempariniri Itomi impogini. ²⁴Maganerotari iniasurentaigakai Tasorintsi kameti ankematsaigakeriniri, teranika paniro iriniasurentaigeri jorioegi, iniasurentaigakerityo aikiro terira iriroegi jorioegi. ²⁵Ariotari okantakeri itsirinkakotanakerira Oseashi okanti:

“Yogaegiri terira nashintaigavetem-pari impoginityo nashintaiganakempari.

Ario inkañoigake yogaegi nokisaigavetakarira impoginityo nonkavintsaavageiganakeri.

²⁶Tyarika kara inaigakera nokantaigakerira: “Tera nashintaigempi”, ario kara inkantaigakenkani inti itomiegi Tasorintsi kantakanirira itimi terira ineimatero igamane.”

²⁷Kantankicha Isaiashi itsirinkakoiganakeri iyashikiiganakerira Iseraere ikanti:

“Intovaigageigavetakempatyo
iyashikiiganakerira Iseraere
inkañoigavetakemparoty
impaneki otsapiakutirira
omaraani nia

kantankicha impogereagarantaiga-
kempaty, intaganivani naigaa-
tsine paniropage irogavisaakoi-
gakerira Tasorintsi.

²⁸ Intsatagakerotari ikantakerira pairani
katsiketyora inkisashiigakempari
maganiro terira inkematsaigeri
impogereagakerira.”

²⁹ Ariotari ikantakeri aikiro Isaiashi
pairani ikanti:

“Gamera itsarogakagumaigai Tasorin-
tsi gaveavagetatsirira impogerea-
sanoigakaemetyo maganiro.

Ankañoigakemparimetyo timaigave-
tacharira pairani Soromaku
ontiri Gomoraku ipogereasanoi-
gakerira maganiro.”

Yogaegiri jorioegi tera inkogaige inkematsaigakerira Jesokirishito

³⁰ Iroventi ¿tyarika ankantaige
maika? Agoigaketari yogaegi terira
irioegi jorioegi teratyo isuretumaigave-
tempa tyara inkantaigakempa kameti
irishineigakempariniri Tasorintsi,
kantankicha maika ineaigakeri kañoma-
taka tenirikatyo inkañoavagetumaigempa,
ikematsaigakeritari Jesokirishito.

³¹ Yogaegiri iseraereegi onti ipampiaiga-
veta ikantakerira Tasorintsi itsirinkaka-
gantaigakenerira, ikogaigavetakatari
intsatagaigakeromera kameti irishineiga-
kempariniri, kantankicha teraty
iragaveaige. Antari intsatagaigakerome
magatiro ario pinkante irishineigakempa-
rime Tasorintsi. ³² ¿Tyara okantaka tera
irishineigempari? Ontitari kantankicha
yaventaigakarora itsirinkakotanakerira
Moiseshi ikogaigavetakara intsatagaiga-
keromera kameti irishineigakempariniri,

tera iriro inkogaige inkematsaigakerira
Kirishito, ikomuigakaritari. Irorotari
ikantakotantunkanirira Kirishito ikañota-
gunkani mapu tivatantatsirira. ³³ Neroty
itsirinkakotantunkanirira pairani okanti:

“Yogari nontigankakerira Shionku
onti inkañotakemparo mapu
ontivatantakenkanirira ovahi
onkaraantakenkani,

kantankicha tyanirika kematsatake-
rine garatyo ikenkisureaa,
gatanika ikematsatiri kogapage.”

10 ¹ Napiagematsaegine, irorosano-
tyo nokogake irogavisaakoiga-
kenkanira notovaireegi, irorotari
omirinka noniirira Tasorintsi iroroty
nokantakeri. ² Naro noneaigakeri
arisanoniroro ikogaigavetaka inkematsa-
tasanoigakerira Tasorintsi, kantankicha
tera irogoige tatoita ikogake Tasorintsi,
onti ikomuigakaro. ³ Tera irogoige
tyarika inkantaigakempa kameti ineaiga-
keriniri Tasorintsi kañomataka tenirika-
tyo inkañoavagetumaigempa, ontityo
ikogaigavetaka tsikyatara irogishineaiga-
keri irioegi. Tera inkogaige intagatira
inkematsaigakeri Kirishito kameti
ineaigakeriniri Tasorintsi kañomataka
tenirikatyo inkañoavagetumaigempa.
⁴ Irorotari ipokashitake Kirishito inkama-
ventaigakerira maganiro kameti
ganigeniri yatsipereaventavageigairo
intsatagaigakerora itsirinkakotanakerira
Moiseshi irogavisaakoigakenkaniniri.
Ikamaventaigakeri kameti ineaigakeri-
niri Tasorintsi kañomataka tenirikatyo
inkañoavagetumaigempa maganiro
kematsaigakerinerira.

⁵ Yogari Moiseshi itsirinkakoigakeri
kogaigavetankicharira intsatagasanoiga-
kerora ikantirira Tasorintsi kameti
ineaigakeriniri kañomataka tenirikatyo
inkañoavagetumaigempa ikanti: “Yogari
tsatagasanoakeronerira ikantirira
Tasorintsi intimagantsivagetake

kameti.”⁶ Kantankicha tyanirika kematsatakerine Kirishito kameti ineakeriniri Tasorintsi kañomataka tenirikatyo inkañovagetumatemala garatyoiniasurentumata inkantakera: “¿Tyanimpatyora gaveankitsine iriatakera enoku iragakiterira Kirishito kameti irogavisaakoigakaeniri?”⁷ Ario okañota aikiro garatyoinkantumati: “¿Tyanirika gaveankitsine iriatakera savipatsaku inagira igamaga iroganiaerira Kirishito kameti iripokaera irogavisaakoigakaera?”⁸ Irovento, tyampatyora okantira Itsirinkakagantakerira Tasorintsi? Ontityo okanti: “Matakatari pogoigakero tyara ikanti Tasorintsi, irorotari piniakoigi, aikiro iroro pisureta-koiga.” Irorotari nokenkitsatakoigirira naroeigi aikiro nokantaigakempira pinkematsaigakerira Kirishito kameti irogavisaakoigakempiniri Tasorintsi.⁹ Pinkantakerika: “Yogari Jeso inti Notinkami”, aikiro pogotasanotakera pinkantakera: “Arisanoniroro yoganiairi Tasorintsi ikamavetakara”, ario pinkante irogavisaakotakempi Tasorintsi.¹⁰ Arisanoniroro ineaigiri Tasorintsi kañomataka tenirikatyo inkañovagetumaigempa yogaegi kematsatasanoigiririra Jesokirishito. Aikiro yogavisaakoigakeri maganiro kantaigatsirira: “Jesokirishito inti Notinkami.”

¹¹ Okantaketari Itsirinkakagantakerira Tasorintsi okanti: “Tyanirika kematsatakerine irirori, garatyoinkenisureaa gatanika ikematsatiri kogapage.”¹² Antari ikantakera maika inti ikantaigake maganiro matsigenkaegi, irirori ineaigakeritari imirinka ario ikañovakagaigaka tera inkantatigumaigempa, intirika jorioegi intirika terira iriroegi jorioegi, panirotari ikantakara irirori, inti Itinkami maganiro. Nerotyopairo ikavintaasanovageigiri

maganiro niaigiririra.¹³ Ariotari okantakeri otsirinkakotunkanirira okanti: “Maganiro niaigakerineririra Atinkami inkantaigakerira irogavisaakoigakerira irogavisaakoigakerityo.”¹⁴ Kantankicha garika yogoigi inti Gavisaakotantatsirira itigankakerira Tasorintsi irogavisaakoigakaera ¿ario tyaratyoinkantaigakempairiniaigakerira inkantaigakerira irogavisaakoigakerira? Aikiro garika ikemakoigiri, ¿tyaratyoinkantaigakempairiogoigakera inti Gavisaakotantatsirira? Aikiro garika tyani kamantaigiri, ¿ario tyaratyoinkantaigakempairinkemakoigakerira?¹⁵ Garika itimi tigankaigakerineririra inkamantaigakerira, ¿ario tyaratyoinkantaigakempa iriaigakera? Ariotari okantakeri Itsirinkakagantakerira Tasorintsi okanti: “Iishineventavagetunkanityokenkitsavageigatsirira kantaigakeririra maganiro tyara inkantaigakempa kameti irogavisaakoigakeriniri Tasorintsi!”

¹⁶ Kantankicha antari ikamantaigave-tunkanirira teratyoinkematsaigemaganiro, ariotari ikantakeri Isaiashi pairani ikanti: “Notinkami, nokamantagavetakari pikantakerira viro, teratyoinkematsaigena.”¹⁷ Irovento maika garika ikemakoigiri Kirishito tyara ikanta yogavisaakotantira, ¿ario tyaratyoinkantaigakempairagoigakera inti Gavisaakotantatsirira? Antari ankemakoigakerira irorotari onkenantakempa agotantaigakempairira kameti ankematsaigakerira.

¹⁸ Kantankicha naro nokanti: Irovento, ¿terorokari inkenkitsatimoigenkani jorioegi? ikenkitsatimoigunkanityo! Okantaketari Itsirinkakagantakerira Tasorintsi okanti:

“Iaigake tovaini kamantantaigatsirira itsotenkagiteavageiganakarotyokara,

ikemaigavakerityo maganiro ikenki-
tsatimoigakerira.”

¹⁹Kantankicha nonkantutaempityo
aikiro: ¿Impa irororakari kantankicha
tera inkemaigavakeri tatoita ikantaigake
yogaegi kenkitsatimoigakeririra?
iIkemaigavakeriniroro!, kantankicha
tera irishineventaigemparo ikamantai-
gakerira. Itsirinkakotakerotari Moiseshi
pairani ikantakerira Tasorintsi ikanti:

“Narori nogavisaakoigakeri pashini
terira nashintaigavetempari
terira irogoigavetempa.

Viroegikya kisaiganankichane.”

²⁰Impo Isaiashi teratyo intsaroge
katinka yogakero itsirinkakotakerora
ikantakerira Tasorintsi iniakoigakerira
terira iriroegi iseraereegi ikanti:

“Yogaegi terira isuretumaigavetena
iriroegi maika sureiganakena
ikematsaiganakenara.

Ario ikañoigaka yogaegi terira
inkogakotagantaigavetena,
maikari maika naro nogotagai-
gakeri tyara nokanta.”

²¹Antari itsirinkakotakerora ikantake-
rira Tasorintsi iniakoigakerira
iseraereegi ikanti:

“Nokantakanityo nokogavetaka
nonkavintsaavageigakerimera,
kantankicha iriroegi teratyo
inkogaige inkematsaigakenara,
ariompatyo ikisaiganakenari.”

**Inkonogagarantaigakempa iseraereegi
irogavisaakoigakenkani**

11 ¹Irovento maika nokanti:
¿Impa ariorakari yovashigantai-
ganakari Tasorintsi maganiro iyashikii-
ganakerira Iseraere ikantavetakarira
inti nashiegi? ¡Teratyo! Pine naro nanti
itovaire iseraereegi, intitari yashikita-
nakena Vejamin iyashikitanakerira

Averan, kantankicha yogari Tasorintsi
teratyo irovashigantena. ²Ario
ikañoigakeri aikiro maganiro notovai-
reegi teratyo irovashigantaigempari,
igantagatari pairani ikantakera:

“Maganiro iseraereegi inti nashiegi”,
ovashi maika aïño yashintaigari tera
irovashigantaigempari. Pogoigiotari
itsirinkakotunkanira Eriashi iniakerira
Tasorintsi ikamantakerira tyara
ikantaigaka iseraereegi ikantiri:

³“Notinkami, ipogereagakeri yogaiga-
kerira kamantantaigatsirira kematsai-
gimpirira, aikiro iokageigakero
itagantapiniigavetarira piratsipage
yamapiniigavetimpirira. Panivanisano-
tyo nokantakara naro notimaira.

Maikari maika ikogaitakena irogaitake-
nara naro aikiro.” ⁴Kantankicha

Tasorintsi ikantiri: “Aïñokyatyo 7,000
surariegi kematsatasanoiganarira terira
intigeroaventumaigempari Vaare
ipegaigakerira pitovaireegi itasorintsie-
gite.”^q ⁵Ario okañotaka maika aïñokya-
tyo paniropage kematsaigiririra

Tasorintsi, tsikyatatari ikavintsaavagei-
gakeri irirori kameti inkematsaigakeri-
niri. ⁶Tera iroro inkavintsaaviigeri
yovetsikaigakerira iriroegi, tsikyatatyo
ikavintsaavageigakeri irirori. Game
ario okañota maika gamerorokari
opaita ikavintsaantira Tasorintsi.

⁷Irovento, ¿tyampatyo okantakara?
Ontityo okañotaka maika. Yogari
iseraereegi ikogaigavetaka intsatagaiga-
kerora ikantirira Tasorintsi kameti
irishineigakempariniri, kantankicha
teratyo iragaveaige. Nerotyo intagani
ishineigaka yogaegi igantagarira
isariaigakari pairani irashintaigakempa-
rira. Yogaegiri itovaireegi ariompatyo
ipegakagaiganakariri kañomataka
tenirikatyo ontimaige isure, ⁸ariotari

okantakeri pairani Itsirinkakagantakerira okanti:

“Ipegakagaigakari Tasorintsi
kañomataka tenirikatyo
ontimumaige isure.

Ineaigavetakatyo posante, kantanki-
cha ipegakagaigakari Tasorintsi
kañomataka terira inee, ganiri
yogoigi tatoita ineaigake.

Aikiro ikemaigavetaka ikenkitsati-
moigunkanira, kantankicha
teraty inkemaigavakera tatoita
ikantunkani.

Igantagatari ikañoigakara pairani
kigonkero maika.”

⁹Aikiro ikantake Iravi:

“Ogari yaventakoigakarira maika
kantetyo onkañotagantaigake-
rira inkisashiigakemparira
Tasorintsi.

¹⁰Impegakagaigakenkanityo terira
ineimaige.

Ario onkañotakempa aikiro garaty
yapakuakagaigaagani yatsipe-
reaigakerira.”

Tasorintsi yogavisaakoigakerira terira iriroegi jorioegi

¹¹Maika nokanti: Antari ikañoigakara
jorioegi maika tera inkogaige inkema-
tsaigakera, ¿ario yovashigantasanoigana-
kari Tasorintsi ganige yogavisaakoigairi?
iTeraty! Ariompatyo ikañoigakara
maika tera inkematsaigeri ovashi
okenantanakaro iriokyari ishonkateiga-
naka pashini terira iriroegi jorioegi
yogavisaakoiganakerira kameti inkogai-
ganakeniri jorioegi irishonkateiganaem-
parira iriroegi aikiro inkavintsaavageiga-
naerira irogavisaakoiganakerira. ¹²Antari
tera inkematsaige iriroegi jorioegi iroro
okenantaka ikavintsaavageigakerira
maganiro matsigenkaegi. Aikiro ikogave-
taka Tasorintsi inkavintsajaigakerimera
irogavisaakoigakerira, kantankicha tera

inkogaige, irorotari okenantakarira
ikavintsaavageigakerira terira iriroegi
jorioegi yogavisaakoigakerira. Kañotari
okañotakara maika okenantakarora
ikavintsaavageigunkanira terira iriroegi
jorioegi, iiroromparorokarityo inkema-
tsaigerira iriroegi jorioegi pairorokarityo
onkenantakemparo inkavintsaavageiga-
kerira maganiro!

¹³Kantankicha pikonogagarantaigaka
terira viroegi jorioegi. Maika nokogake
nonkantaigakempira inti tigankakena
Tasorintsi noatakera nonkenkitsatimoiga-
kerira pitovaireegi, irorotari nopirininven-
tantasanotakarorira, ¹⁴noneaketari
ariorika ineaigakempira notovaireegi
pikematsaigakera viroegi ovashi inkogai-
ganake irishonkateiganaemparira
Tasorintsi inkavintsaavageiganaerira
iriroegi aikiro kameti inkañoigakempiniri
viroegi irogavisaakotagarantaigakenkani-
niri. ¹⁵Kañotari maika okenantakarora
ikisaigakerira Tasorintsi jorioegi iriokya
ishonkateiganaka terira iriroegi jorioegi
yogavisaakoigakerira ariomparorokari
inkematsaigerira jorioegi pairorokari
onkenantakemparo irishineigakemparira
Tasorintsi iriroegi aikiro irogavisaakoiga-
kerira, okyara kañomatakatarari ontinirika
ikamaigavetaka, kantankicha irogavisa-
koigakeririka ariokya onkañotakempa
oganirika yaniaiganai. ¹⁶Yogari Averan
intitari yashikiiganakeririra maganiro
jorioegi. Kañotari irirori ikogakagakerira
Tasorintsi irashintasanotakemparira,
¿ario gara ikañotagaigari iyashikiigana-
kerira impogini? Pine inchato terika
onkame opari teraty onkame magatiro,
aityotari anii. Ario ikañotaka Averan
ikematsatakeri Tasorintsi, arioty
inkañoigake impogini iyashikiiganake-
rira inkematsaigaketyo, itsitiventakero-
tari pairani Averan ikematsatakera.

¹⁷Yogari jorioegi terira inkematsaige
ontinirikatyo ikañoigakaro otsego orivo

okamatsegotira ovatuinkani ovuokunkani. Impo agashitunkani otsego orivoniro ogontapatantaagani kameti oganiavaerora. Viro onti pikañotakaro otsego orivoniro ogontapatantaaganirira kamatsegovetankicharira otsego, teranika viro jorio, kantankicha yogari Tasorintsi ishonkatetanakempi yogavisaakoigakempira, teranika inkematsaigeri jorioegi.¹⁸ Kantankicha tsikyanira paventakovagetakari pineakera pavisagakerira irioegi, vintitari yogavisaakotake Tasorintsi. Paventakovagetakempirika atsi suretaemparotyo iketyora kematsatankitsi pairani Averan, ovashi oponiantakarira pikematsatanakera viro maika, teranika viketyo kematsatatsine. Pine orivo tera iroro ganierone otsego, ontityo ganiiro opari.

¹⁹Impa pinkantakerorokari: “Pikantasa-notakeniiroro, kantankicha ikisaigakerityo Tasorintsi jorioegi terira inkematsaigeri narokyaniri irishonkatetanakempa irogavisaakotakenara kañotaka ovatuinkanira kamatsegotankitsirira irorokya opugakagunkani ogontapatantunkanira otsego orivoniro.”²⁰ Arioniroro, kantankicha tera inkisaigeri Tasorintsi kogapage, ontitari ikisaviigakeri ineakera tera inkematsaigeri. Virori ontitari pikematsatakerira, irorotari yogavisaakotantakempirira. Nerotyo nokantantakempirira maika tsikyanira paventakovagetakari.²¹ Irorotari ikisaviigakeri iyashikiiganakerira Averan teranika inkematsaigeri, ariorika pikañotake viro garika pikematsatiri viromparorokari paio inkisakempi.²² Atsi geratyo kavako. Pairo ikavintsaa-tavageti Tasorintsi, kantankicha aikiro iriroriratyo niimatanankitsine intsatagerotyo inkisaigakerira maganiro terira inkematsaigeri. Irorotari ikisantaigaririra jorioegi terira inkematsaigeri, virori onti ikavintsaavagetakempi, kantankicha

pinkantakanira pinkematsavagetakeri kameti inkantakaniniri inkavintsaavagetakempi. Antari garika pikañota maika inkisakempityo viro aikiro.²³ Kantankicha inkematsaigera jorioegi terira inkematsaigavetempa, yogari Tasorintsi intentagantaigaemparityo irapijorioegitene terira inkisaigeri okyara, yagaveavagetitari irirori.²⁴ Kañotari viro akyari yogavisaakotimpi Tasorintsi itentagantaigakempirira maganiro kematsaigakeririra iriromparorokarityo jorioegi inkematsaigerira paio intentagantaigakempari itovaireegi kematsaigakeririra pairani.

Tasorintsi irogavisaakoigakeri maganiro iseraereegi

²⁵Maika, napigematsaegine, nokogake pogoigakerora terira ogovetenkani pairani kameti ganiri paventakoigaro pogovageigira. Ikonogagarantaigaka iseraereegi ipegakagaigakari Tasorintsi kañomataka terira ontimaige isure, kantankicha impogini inkematsaiganakera maganiro terira irioegi jorioegi kematsaigankitsinerira, ario pinkante ganigetyo ikañoigaa maika.²⁶ Onkañotanakempirika maika ario pinkante irogavisaakoigakenkani maganiro iseraereegi, ariotari okantakeri Itsirinkakantakerira Tasorintsi okanti:

“Iripokake Gavisaakotantatsirira
imponiakempa Shionku

irapakuakagaigakerira ikañovageigakara maganiro iyashikiiganakerira Jakovo irogavisaakoigakerira.

²⁷Nogavisaakoigakeririka onti nontsata-gakerora nokantakeririra pairani yashikiiganakeririra.”

²⁸Maikari maika onti ikisaigakeri Tasorintsi jorioegi kameti inkenkitsatimoitakempiniri maganiro terira viroegi jorioegi inkamantaitakempira tyara ikanta Tasorintsi yogavisaakotantira.

Kantankicha irirori aiñokyaty itaigari jorioegi, igantagatari isariaigakarira irogavisaakoigakerira irashintaigakemparira pairaninirira yashikiiganakeririra. ²⁹Yogari Tasorintsi irirorira niimatankitsine garatyto ikantatigumatiro ikantakerira. Tatarika oita ipumaigakai garatyto yagapitsaigajairo. Ario okañotaka tyanirika isariaaka irogavisaakotakerira intsatagakerotyto garatyto ikantumati: “Maika ariompa gara nogavisaakotiri, ario inkañotake.” ³⁰Antari pairani viroegi tera pinkematsaigavetempari Tasorintsi, kantankicha irirori itsarogakagaigakempityo maika, ineiaigakeritari jorioegi tera inkematsaigeri. ³¹Ariotari ikañoigakari iriroegi maika tera inkematsaigeri, kantankicha impoginityo intsarogakagaiganaempari Tasorintsi inkañotagaigakempira viroegi itsarogakagaigakempira. ³²Ineiaigakeritari Tasorintsi pairani ikañovageigakara maganiro yovetsikageigakera terira onkametite, irorotari ikisantaigakaririra. Onti ikañotagaigakari maika kameti intsarogakagaigakempariniri maganiro inkavintsajaigakerira.

³³ ¡Tyarikarorokari, pairotyo ikavintsaantavageti Tasorintsi! ¡Pairo yogovageti inegintegetakero-tyo magatiro kara! Garatyto agotumaigiro isuregetarira irirori, ario okañotaka aikiro garatyto agotumaigiri tyara ikanta irirori.

³⁴ “¿Matsi tyanimpatyora gotakero isuregetarira Tasorintsi? ¿Matsi tyanimpatyora gaveankitsine irogotagakerira?

³⁵ Ario okañotaka ¿matsi tyanimpatyora gaveankitsine impakerira tatarika oita kameti impugataemparira irirori inkavintsakerira? ¡Garatyto tyani gaveimatatsi!”

³⁶ Magatirotari oneagetunkanirira inti vetsikagetakero irirori, aikiro inti shintsitagageti, iriroritari shintagetaro magatiro.

Iroroventi maika itsamekario ashineventaigakemparira ankantakanira ankantaigakeri: “¡Pairo pikamativageti!” Ario onkañotakempa. Amen.

Impanirotasanotakenkanira Tasorintsi

12 ¹Maikari maika, napigematsaegine, matakatar pineaigake tyara ikantaka Tasorintsi itsarogakagaigakempira. Irorotari maika nokogasantakarira nonkantaigakempira kametitaketyo pinkantaigakerira: “Maika, Apa Tasorintsi, nokogake pashintasanotakenara kameti nompanirotanakempiniri viro nonkematsatanakempira. Tyarika pinkantakena, kametitaketyo.” Impo pinegintetasanovageiganakempara ganigeniri okitsitinkaigaimpikañovagetagantsi kameti irishineventagakempiniri irirori, irorotari ikogasanoti pinkañoigempara maika. ²Gara pogiatakoigiri yogaegi matsigenkaegi terira inkematsaigeri Tasorintsi, onti pinkantatigaiganakempa pisureigakempara ganigeniri pikañoigaa pairani. Pinkañoigakemparika maika pogoiganake tatoita ikogagetake Tasorintsi. Tera inkogumatenika tatarika oita terira onkametite, onti ikogake povetsikaigakera tatarika oita ishineventakarira irirori pintsatagerora magatirosanotyto ikogagetakerira. ³Yogari Tasorintsi ikavintsaakenatari ikogakagakena nonkenkitsatimoigakerira maganiro, irorotari maika nonkantantagakempirira garatyto paventakovageiga pinkantaigakera: “Navisaigakeri pashini”, onti oketyo pineasanoigakempa paniropage tyara pikantaigaka kameti katinkaniri pogaigakero. Ikantatigakagaigakempitari Tasorintsi yagaveakaga-

geigakempira paniropage okyara pikematsaigakerira. ⁴Kañotari aroegi aityo akoegi, akiegi, agitieg, magatiro. Tera ario onkañotasanogetemparo otovairepage, patiropagetyo okantatigagetaka. Pine akotsi onti airikantagani, ogari okitsi onti oneantagani, irorokya gititsi onti anuitantagani. ⁵Ario akañoigaka aroegi kematsaigiririra Kirishito, atovaigavetakatyo kantankicha irirori ineaigakai paniro anaigake, ariotari atentagavakaigaigakari akematsaigakerira, aikiro amutakovakagaiga.

⁶Tasorintsi ikantatigakageigakaitari paniropage yagaveakageigakaira. Tatarika ikogakageigakai irirori antaigakera yagaveakagaigakaityo. Irororika yagaveakagakempi pinkenkitsavagetakera pinkenkitsavagetaketyo, kantankicha gara povashigakotumatanakaro ikantakempirira Tasorintsi. ⁷Irororika yagaveakagakempi pimutakotantavagetakera katinkatyogakero pimutakotantavagetaketyo. Irororika yagaveakagakempi pogotagantakera irorotyog pimpiriniventake pogotagantavagetakera. ⁸Ario okañotaka irororika yagaveakagakempi pishintsitagantakera irorotyog pimpiriniventake. Ariorika inkantakempi Tasorintsi pinkavintsajaigakerira papigematsaegine pimpagarantaigakerira pashintakarira, kametikyatyog pimpaigakeri gara pimichatapitsaigari. Ariorika inkantakempi pomperatantakempara negintekyatyog pomperatantavagetakempa. Ontirika yagaveakagakempi pintsarogakagaigakemparira tsipereavaigankitsirira pinkavintsaaavageigakerityog pishinevagetakempara.

**Tyara inkantaigakempa
kematsatanoigiririra Tasorintsi**

⁹Gara pikantamampegaigari pitovaireegi kogapage: “Notakempi”, ontityo arisano pintasanoigakempari. Aikiro garatyog pishineventumageigaro tatapage-

rika oita terira onkametite, ontityog pishineventasanoigakempa pinegintevaigakempara. ¹⁰Pintasanoigakemparira papigematsaegine pinkañotagaigakemparira intinirika pirentiegisanorira. Pineaigakeririka yavisagakempira pishineventaigakemparityog, pimpinkatsaigakerira. ¹¹Tatarika oita pantaigake garatyog piperatumaigaro ontityog pishineventaigakemparo, pogoigaketari inti pantaigakene Atinkami. ¹²Pishinevageigakempatyog kara pogoigaketari intsatagakero Tasorintsi isariaigakempira inkavintsajaigakempira. Kametikyatyog pantsipereakovageigakemparo tatapagerika oita patsipereagake, gara papakui-mati piniakerira Tasorintsi. ¹³Tatarika ikogakoigaka papigematsaegine pinkavintsajaigakerityog pimpaigakerira. Tyanirika atimoigakempine pagaigavakerira pinkaemaigavakerira pivankokupineginteigavakerira.

¹⁴Garatyog pikisumanaigiri tsipereakagaigampirira, ontityog piniaventaigakeri pinkantaigakerira Tasorintsi inkavintsaaavageigakerira. ¹⁵Pineakeririka pitovaire irishinevagetakempara pishinevagetakempatyog viro aikiro. Antari ontirika pineakeri ikenkisureavagetakara pinkenkisureakotakemparityog viro. ¹⁶Gara pikisavakagaiga, kametikyatyog pagavakagaigakempa. Aikiro gara paventakovagetumaiga, ontityog pinkonovageigakempari terira iravisantavageige. Gara pikantaigi: “Nogovagetityog kara.”

¹⁷Tyanirika kisaigakempine garatyog pipugaigari. Pinegintevageigakempara pintimaigakera kameti ineaigakempiniri maganiro arisano opaitaka pinegintevaigakara tera pamatagumaigempa. ¹⁸Pinegintevageigakerira pitovaireegi ganiri tatoita okenanta inkisaigakempira kameti pagavakagaigakempaniri pishinevageigakempara. ¹⁹Napigematsaegine notasanoigarira, gara tsikyata pikenki-

ventaiga viroegi, tsikyatyato inkisashiiga-kempari Tasorintsi maganiro kisashiiga-kempirira. Ariotari okantiri Itsirinkakagantakerira okanti: “Ikantake Atinkami: Tsikyata naro nonkenkiventaigakempi, nonkisashiigakemparityo kisaigakempirira.” ²⁰Kantankicha ikantake aikiro:

“Pineakeririka kisashitakempirira yatsipereakera itasegane pimpakerityo viro isekatakempara.

Ontirika imiretake pimpakerityo iroviikakempara.

Pinkañotakemparika maika oga inkenake impashiventanakempa.”

²¹Tyanirika kisaigakempine pinkemisan-takoigakempatyo gara pipugaigari. Ontityo pinkavintaavageigakeri kameti pagaveaigakeriniri pogametaigakerira.

13 ¹Maika nonkantaigakempi kametitake maganirosano pinke-matsaigakerira pigoveenkariegite intiegiri aikiro pitinkamiegi. Imirinkatari tera tsikyata impegagempa kogapage pitinkamiegi. Intitari pegakagaigakeri Tasorintsi. ²Nerotyo tyaniirika kisashita-kemparine igoveenkarite gara ikematsatiri inkisashitakemparityo Tasorintsi ineakeritari tera inkematsateri irirori, tera inkematsaterinika ipegagagavetakarira igoveenkarite. Ikirotyo kañotagan-tankichane. ³Yogaegiri pitinkamiegi tera iroro intimashiige iromintsarogaigakerira negintevageigankicharira, intityo itimashiigake vetsikaigankitsirira terira onkametite. Terika pinkoge iromintsarogaigempira pitinkamiegi iroroventi negintevagetempaty kameti irishineigakempiniri. ⁴Irorotari ipegagagaviigakeri Tasorintsi pitinkami ineginteigakempira. Antari garika pikematsaigiri ario pinkante pimpinkaigakerityo, teranika kogapage impegakagaigari Tasorintsi

pitinkamiegi. Ontitari ipegagagaviigakeri inkisaigakerira vetsikaigatsirira terira onkametite. ⁵Irorotari nonkantaigakempirira pinkematsatasanoigakerira pitinkamiegi. Gara patiro pikematsaviigiri ganiri ikisaigimpi, ontityo aikiro pinkematsaigakeri pogoigaketari ikogake Tasorintsi pinkematsaigakerira. ⁶Irorotari pipagarantantaigaririra pigorikiegite, ontitari ipiriniventaigi ikogakagaigakeririra Tasorintsi irantaigakerira. ⁷Punaigiri maganiro pipegakogeigirira. Inkantakerika pipagarantaigakerira koriki pimpaigakerityo, gara pipegakoigiri. Pimpinkatsaigakerira, aikiro pinkematsavageigakerira gara pisamatsatumaigiri, intitari pitinkamiegi.

⁸Gara pipegakotantumai, onti pintavakagasanogakempa. Tyanirika tasanotakemparine itovaire itsatagakero itsirinkakotanakerira Moiseshi. ⁹Okantunkanitari: “Pintsarogakagavagetakemparira pitovaire pinkañotagasanotakempaty pitsarogakagara vikiro.” Yogari kañotirorira maika itsatagakerotyo otsirinkakotunkanirira okantira: “Gara pineakotantavageti tsinane, gara poganti, gara pikoshiti, gara pitsoeventari pitovaire, gara pikogutantiro yashintagetarira pashini.” Aikiro itsatagakero otovaire kañopagerira oka. ¹⁰Maganirotari tasanotaririra itovaire itsatagakero magatiro itsirinkakotanakerira Moiseshi, teranika tyara inkantumateri.

¹¹Maika nonkantaigakempi pinkañoigakempa maika pogoigaketari panikya iripokaate Atinkami iragaigaatera intentaiganakaera enoku. Antari akyara kematsaiganakeri aneaigakeroty osatyotiro osamanitira, kantankicha maika atake ochoenitapaake iripokaatera. Irorotari maika tsame ampiriniventava-

geigakerora ikogagetirira Tasorintsi gara akañoigari peranti imagasevegetira ivankoku. ¹²Maikari maika atimaigakera aka ovatsatira kañovegetagantsi onti kañomataka ontinirikatyo apavatsaaseta-koigaka, kantankicha panikyatyo iripokaate Atinkami. Antari iripokaatera ario pinkante onkañotakemparo akutagitetakoigira, ganigetari aneaigairo kañovegetagantsi. Irorotari maika tsame ampakuaiganakerora magatiro omanashigetaganirira irorokya ampiriniventaigana-ke ikogagetirira Tasorintsi. ¹³Anegintetanovageigakempara gara avetsikumai-giro tatapagerika oita gipashiventantagetatsirira. Gara atumaigi yapatoitaigara yovetsikagisevageigirora posantepage terira onkamentite. Gara ashinkivageiga. Gara avegagavageigi. Aikiro gara apiriniventaigiro tatarika oita terira onkamentite onti ovashi ameniaiganakemparo. Gara akisavakagaiga, aikiro gara atsimaventavageiga. ¹⁴Intityo aventaigakempa Atinkami Jesokirishito kameti ishintsitagaigakaeniri ganiri apiriniventaigiro akogageigakerira aroegi avetsikai-gakerora terira onkamentite.

**Gara okantavitantagani terira
inkantavitantero Tasorintsi**

14 ¹Ariorika aiño papigematsaegine tekyasanorira irogote, kantankicha ikogake inkonoigakempira anta papatoitaigara, viroegi pagaigavakerityo gara pikantaigiri: “Tekyatanika pogotasa-note.” ²Pine ikonogagarantaigaka ikantaigake kametitake agaigakempara ivatsa. Pashini tesakona irogoige tera irogaigempari. ³Yogari gaigaririra ivatsa garatyo ikantaigiri terira irogaigempari: “Tera pogote.” Irirokya terira irogaigempari garatyo ikantaigiri gaigaririra: “Onti povetsikake terira onkamentite”, matakatarari yashintakari Tasorintsi ipegakerira itomi. ⁴¿Matsi tyanimpatyora viro

kameti pinkantakerira papigematsatene ariorika yovetsikake kameti ontirika tera? Tsikyatatyo inkantakeri Atinkami, irirotari neasanotakeri tyara ikanta. Kantankicha irovetsikaketyo kameti, iragaveakagakeritari Atinkami.

⁵Okañotakara aikiro ikonogagarantaiga aiño kantaigatsirira aityo kutagiteri paio avisake okametitakera, intagati ompiriniventakenkani irishineventakenkanira Tasorintsi. Pashinikyatyo kantaigankitsi omirinkatyo kutagiteri ario okañovakagaka, kantankicha virompaegityo viroegi, paniropagetyo pisuretasanoigakemparo tyara pinkantaigakempa kameti irishineventagakempiniri Atinkami. ⁶Yogari kantaigatsirira aityo kutagiteri pairorira avisake okametitakera onti ikantake maika kameti irapakuakeniri yantavagetakera ompote impiriniventakerira Tasorintsi irishineventakemparira. Ario ikañoigaka aikiro gaigaririra ivatsa, yogaigari ineiaigaketari iroro ikogake Tasorintsi, nerotyo omirinka isekataigara ishineventagakari Tasorintsi iniaigakeri ikantagakeri: “Apa Tasorintsi, noshinevageigakatyo pipaigakenarira yoka nogaigakemparira maika.” Ariotyo ikañoigaka terira irogaigempari ivatsa, ineiaigi ariori tera inkoge Tasorintsi irogaigakemparira. Aikiro iriroegi omirinka isekataigara ishineventagakari Tasorintsi ikantaigakeri: “Apa Tasorintsi, noshinevageigakatyo pipaigakenarora oka noseka nogaigakemparira maika.”

⁷Teranika antimashiigemparo aroegi kogapage kameti avetsikaigakera tatarika oita akogaigakerira aroegi. Ario onkañotake ankamaiganaera, garatyo tsikyata akamashiigaro aroegi. ⁸Aiñokyarika atimaigi ontityo atimashiigake avetsikaigakerora ikogagetirira Atinkami. Antari ankamaiganaera onti aigake iriroku antentaigakemparira. Ariotari

okañotakari maika, aiñorika antimaigake ontirika ankamaigake aiñotyó irashintai-gajae Atinkami. ⁹Ikamakítitiri Kirishito impo yanianai kameti imegakempara Itinkamiegi maganiro kematsaigiririra aiñokyarira itimaigi intiegiri aikiro kamaigankitsirira. ¹⁰¿Antari gara pikantiri viro papigematsatene yovetsikake terira onkametite? ¿Antari gara pikantiri tera irogote? Maganirosanotari aroegi aratinkimoigakeri Tasorintsi impogini inkantaigakaera ariorika avetsikaigake ikogakerira irirori ontirika tera. ¹¹Okantaketari Itsirinkakagantakerira Tasorintsi okanti:

“Ikanti Atinkami: ‘Arisanotari notimake naro, maganirosanotyó intigeroaventaiganakena inkantaigakenara: Arisanoniroro vinti Tasorintsisanorira.’”

¹²Irorotari agotantaigakarira impogini ankamantageigakeri Tasorintsi magatiro avetsikaigakerira aiñokyara atimaigi kipsatiku.

Gara pikañovagetagaigari papigematsaegine

¹³Irorotari maika nonkantantaigakempirira tera onkametite aniashinaigakemparira apigematsaegine ankantaigakera: “Yovetsikake irirori terira onkametite.”

Onti kametitake ankantaigakera: “Garatyó novetsikumati tatarika oita kañovagetagakerine napigematsatene impo ganigera ikematsatairi Atinkami.”

¹⁴Naro nokematsatasanotakeritiri Atinkami Jeso nogotantakarira kametitake irogagetakenkanira posantepage ivatsa, kantankicha aiñorika kantankitsinerira: “Tera onkametite pogemparira”, garatyó yogari. Irogakemparirika onti irovetsikake terira onkametite. ¹⁵Ariorika pogakempari ivatsa ikantakerira papigematsatene tera

onkametite irogakenkanira impo iroro onkenantakemparira irogakemparira irirori aikiro. Antari pinkañotakempara maika, tera pintasanotempari papigematsatene, pikañovagetagakaritari. Yogari papigematsatene, intitiri ikamaventakerrira Kirishito. Tsikyanira pikañovagetagarikari impo ganigera ikematsatairi Kirishito intagatira ineakempira pogakerrira ivatsa ikantakerira irirori tera onkametite irogakenkanira. ¹⁶Pineakerika viro kametitake pogakemparira ivatsa kantankicha aiñorika pashini papigematsatene kantankitsinerira tera onkametite pogemparira iroroventi garatyó pogari viro ganiri iniashinatimpi inkantakera onti povetsikake terira onkametite.

¹⁷Yogari itinkamitakarira Tasorintsi teranika iroro isuretasanotempa ariorika irogaketakempa posante ontirika gara, aikiro ariorika iroviikakempa posante ontirika gara. Ontityó isuretasanota tyara inkantakempara irovetsikagetakerora ikogaketakerira Tasorintsi. Aikiro isuretasanota tyara inkantakempa intentaigakemparira irapigematsaegine intimaigakera kameti ganiri ikisavakagaiga, ontiri aikiro ishinetaka isureku, intitiri gishineakeri Isure Tasorintsi.

¹⁸Yogari kematsatiririra Kirishito kañotacharira maika iriro pinkante ishineventaka Tasorintsi intiegiri aikiro matsigenkaegi. ¹⁹Iroroventi maika tsamekario anegintevageiganakempara kameti ganiri akisavakagaiga, ompote amutakovakagaigakempañiri ariompañiri ankematsatanoganakeriri Tasorintsi.

²⁰Tsikyanira pikañovagetagaigarikari papigematsaegine ganigera ikematsaigai, onti pinkañovagetagaigakempari garira pikogaigi viroegi pampakuagerira ivatsa pogaigarira. Kametitakeniroro pogaigakemparira posantepage ivatsapage, kantankicha antari pinkañovagetagakeririka papigematsaegine

pogakarira ivatsa, ario pinkante tera onkametite pogakemparira. ²¹Pineaigakerika okenkisureakagaigarira papigematsaegine pogemparira ivatsa teratyo onkametite pogakemparira. Ario okañotaka poviikaigara poiripage pineaigakerika okenkisureakagaigarira teratyo onkametite poviikakemparora, teranika onkametite povetsikera tatarika oita kenkisureakagerine papigematsatene ontirika onkañovagetagakeri, garira ontirika ampakuakagakeri ikematsavetakara. ²²Antari pineakarika viro kametitake pogakemparira ivatsa garatyo paventakovageta pinkamantanaigakerira pashini, intaganityo pinkamantake Tasorintsi. Kametitake oketyo pisuretasantakempari tatoita kametitankitsi povetsikakerira impo povetsikakerorika pishinevegetakempa, pogotaketari tera ario pinkañovagetumatempa. ²³Kantankicha yogari terira irogotasante ariorika kametitake irogakemparira ivatsa ontirika tera, yogakaririka ontityo ikañovagetaka, akyatari ikantavake: “Impa terakari kameti nogemparira.” Omirinkatari tatarika oita avetsikageigirira akyari akantaigavake: “Impa terakari onkametite novetsikakerora”, ontityo akañovageigaka.

Kematsaigatsirira

isuretakovakagaigakempara

15 ¹Irorotari maika aroegi gotasanoigankitsirira tyara ikanti Tasorintsi kametitake ashintsitagaigakerira apigematsaegine tekyasanorira irogotasanoige. Gara akiro suretakoigaa-cha, intagatira avetsikaigake akogaigakerira aroegi. ²Ontityo asuretakoigakempari apigematsaegine irirori ankavintsaigakerira agishineagakerira kameti ariompaniri inkematsatanotanakeri Tasorintsi. ³Kañotari Kirishito tera iriuro suretakotachane ikiuro irovetsikakera

ikogakerira irirori, ontityo ikañotagunkani okantakerira Itsirinkakagantakerira Tasorintsi okanti: “Yogari samatsanaigakemparira viro nantityo isamatsanai-gake.” ⁴Magatiroitari Itsirinkakagantakerira Tasorintsi onti otsirinkashitunkani agoigakera tatoita ikantake kameti ariompaniri agiakoiganakempari intsatagakerora magatiro ikantakerira pairani isariaigakaira irogavisaakoigakera. Irorotari gishineagakai ogotagagakaira tyara ankantaigakempa kametikyara antsipereakovageigakempa. ⁵Irorotari Tasorintsi gaveakagaigakai antsipereakovageigakempara, aikiro irirottyo gishineagakaene. Nokogaketyo iragaveakagaigakempira pagavakagaigakempara ganiri pikisavakagumaiga, irorotari ikogakerira Jesokirishito pinkañoigakempara maika ⁶kameti pintentavakagaigakempaniri pishineventaigakemparira Tasorintsi Iriri Atinkami Jesokirishito pinkantaigakera: “Pairo ikamativageti Tasorintsi.” ⁷Irorotari maika nonkantaigakempi pagavakagaigakempara pintavakagasanoigakempara, ariotari ikañotagaigakairi Kirishito aroegi itasanoigakaira yogavisaakoigakai antentaigakempariniri irirori. Ikañotagagakai maika kameti ineakenkaniniri Tasorintsi pairo ikamativageti.

Jorioegi ikamantaigunkanira

Niagantsi Kametiri

⁸Maika nonkantaigakempi pairani ipokuti Kirishito aka kipatsiku intimimoiguterira jorioegi kameti ontsatagakempara ikantaigakeririra Tasorintsi pairani yashikiiganakairira aroegi jorioegi ompote ogotakenkaniniri Tasorintsi tera inkantatigumatero ikantirira. ⁹Ipokashiigakeri aikiro terira iriroegi jorioegi kameti irishineventaigakempariniri Tasorintsi inkantaigakera: “Pairotyo itsarogakaganta Tasorintsi.”

Okantitari Itsirinkakagantakerira
Tasorintsi okanti:

“Irorotari noshineventantaigakempirira nontentaigakemparira terira iriroegi jorioegi, nomatikaventaigakempira.”

¹⁰Aikiro aityo pashini otsirinkakotunkani okanti:

“Maganiro terira viroegi jorioegi, ipishinevageigakempara pintaigakemparira maganiro yashintaigakarira Tasorintsi!”

¹¹Impo aityo pashini okanti:

“Pishineventaigakemparira Atinkami maganiro terira viroegi jorioegi, maganirosanotyo pinkantaigakeri pairotyo ikavintsaanti.”

¹²Itsirinkake aikiro Isaiashi pairani ikanti:

“Impogini imechotake paniro iyashikitanakerira Isai.

Irirori pegankichane impogini

Igoveenkariegite maganiro terira iriroegi jorioegi.

Iriroegi irogiakoigakempari inkavintsaigakerira.”

¹³Yogari Tasorintsi irirotari gaveakagaigakai agiakoigakempara ontsatagakenkanira magatiro ikantakerira pairani isariaigakaira irogavisaakoigakaera. Nokogaketyo irogishineagikempira ganiri tatakona povankinaventumaiga, pikematsaigakeritari. Aikiro nokogake iragaveakagaigakempira Isure Tasorintsi ganiri piperatumaiga pogiakotasanovaigakempara.

¹⁴Napigematsaegine, maika gotasanotakena pikavintsaantavageigakera, aikiro pogotasnovageiganakero magatiro ikantakerira Tasorintsi, pagaveasanoigake kametikyara pinkanomaavakagaigakempa, aikiro kametikyara pogotagavakagaigakempa. ¹⁵Kantankicha naro teratyo nontsarogumate nontsirinkaigakempira kañotaka maika nosuretagaigampirora

nokamantageigakempirira karanki ganiri pimagisantaigiro. Notsirinkaigakempi maika ikavintsaakenatari Tasorintsi ¹⁶ikogakagakena intigankakenara Jesokirishito nonkenkitsatimoigakerira terira iriroegi jorioegi nonkamantaigakerira tyara ikanta Tasorintsi yogavisaakotantira. Onti nokenkitsavagetake kameti inkematsatagaigakeriniri Isure Tasorintsi inkantatigakagaigakerira ovashi irishineigakempari Tasorintsi irashintaigakemparira.

¹⁷Kametitaketyo noshinevagetakempara noneaketari yogavisaakotagarantagakerira Jesokirishito nokenkitsatimoigakerira. ¹⁸Intagati noniakotake yogaveakagakenara Kirishito nonkematsatagaigakerira terira iriroegi jorioegi. Ikemaigakenatari nokenkitsatimoigakerira, aikiro ineasanoigakena tyara nokanta naro.

¹⁹Yagaveakagakena Isure Tasorintsi novetsikakera terira oneimagetenkani kameti ogotakenkaniniri arisano inti tigankakena Tasorintsi. Nokañotaka maika nokenkitsavagetake nokamantagakerira maganiro tyara inkantaigakempa inkematsaigakerira Kirishito irogavisaakoigakenkaniniri. Notsititapanutiro Jerosarenku notsotenkavagetanakerotyo kara noavagetakerotyo Iririkoku. ²⁰Ontitari nokogake nonkenkitsatimoigakerira yogaegi tekyarira inkemakotumai-geri Kirishito ganiri inti nopirinventagiti nokenkitsatimoigirira yogaegi ikenkitsatimoigunkanirira. ²¹Ontityo nokogake ontsatagakempara okantakerira pairani Itsirinkakagantakerira Tasorintsi okanti:

“Inkemakoigakeri terira inkemakotumaigavetempari, irogoiganakero terira inkamantumaigavetenkani.”

**Pavoro ikogavetakara
iriatkemera Iromaku**

²²Irorotari pine maika nokogagevetakatyanoatakera noneaigakitempirira

kantankicha teratyo nagavee. ²³⁻²⁴Kantankicha maika notsotenkaigakeritari nokenkitsatimoigakerira timageigatsirira aka, ariokya noatanake Esepañaku ovashi noneaigapanutempi viroegi. Nogantagatari nopintsatara noneaigempira. Impogini nompokakerika kara noneaigapanutempira noshinevetakempatyo kara anetsaavakagaigakempara. Imponavisanakerika Esepañaku nokogavetaka pogavokiigutenara pimpaigavakenara nonkogakotakempira.

²⁵Kantankicha maika oketyo noatapanute Jerosarenku, namaiganakenerira koriki apigematsaegine timaigatsirira anta. ²⁶Yapatoigakeneritari Maseroniakunirira intiegiri Akayakunirira impakagantaigakerira apigematsaegine kogakovageigankicharira timaigatsirira anta Jerosarenku. ²⁷Iroegi pashinity inaigavetaka kantankicha isuretakoigakarityo irimutakoigakerira jorioegi kematsaigatsirira, ineaiaketari iriro jorioegi kenkitsatimoigakeri ikamantaigakerira tyara inkantaigakempa irogavisaaikoigakenkanira. Ikogantaigakarira iragagarantaigakera yashintaigakarira iriroegi impakagantaigakerira. ²⁸Irorotari maika noatanake Jerosarenku nompagapanuterira, imponompigake noatanakera Esepañaku, asatyoneaigapanutempi kara. ²⁹Nogotasannotaketari nompokakerika kara inkavintsavaagetakena Kirishito iragaveakagakenara nonkenkitsatimoigakempira kameti ashinevageigakempara.

³⁰Napigematsaegine, viroegi pikematsaigakeri Atinkami Jesokirishito, aikiro yagaveakagaigakempi Isure Tasorintsi pitasanoigakenara. Nonkantantaigakempirira maika nokogasanotaketyo piniaventasanoigakenara ³¹pinkantaigakerira Tasorintsi impugamentakenara ganiri tyara ikantaigana terira inkematsaige Joreakunirira, ontiri aikiro kametikaniri iragavakeri koriki

namaiganakeneririra apigematsaegine Jerosarenkunirira irishineventaigavakemparira ³²kameti impogini irirorika kogankitsine Tasorintsi nogonketakempapaniri kara noshinevetakempara noneaigakempira ovashi agishineavakagaigakempa. ³³Maika, napigematsaegine, nokogake irisentaigakempira Tasorintsi irogishineigakempira pisureku. Ario onkañotakempa. Amen.

Pavoro isuretakoigakarira irapigematsaegine timaigatsirira Iromaku

16 ¹Ariorika pineaigavakero oga apigematsaegine Peve ogonketakempara kara. Irorori onti kavintsajaigiririra kematsaigatsirira Senkerekakunirira patoventapiniigarorira Iriniane Tasorintsi. ²Kametikyara pagaigavakero ariotari okañoigakempiri viroegi okematsakerira Atinkami. Pineginteigavakerora, vintiegitari kematsasanoigatsirira. Pimutakoigakerora, aikiro pimpaigakerora tatarika oita onkogakotakempa. Ariotari okañotakari irorori omutakotantavagetakera, omutakotanakenaty naro aikiro.

³Pinkantaigakerora Pirishira intiri Akira nosureigakari kametikyarikara inaigake. Iriroegitari notentashivageigakarira karanki nantavageigakenerira Jesokirishito. ⁴Ipimantaigavetanakarotari igamane kameti ganiri nanti kamatsi, irorotari maika noshineventaigakarityo kara, kantankicha tera paniro naro shineventaigemparine, ishineventaigakarityo aikiro maganoro kematsaigatsirira terira iriroegi jorioegi patoigeigacharira parikotipage. ⁵Pinkantaigakeri aikiro nosureigakari apigematsaegine patoitapiniigacharira ivankoku. Nosuretakari aikiro notasanotarira Epeneto iketyosanoirira kematsakeri Kirishito anta Ashiaku.

⁶Pinkantaigakerora aikiro Maria nosuretakaro, noneaketari antavagetakera omutakovageigakempira viroegi.

7Nosureigakari aikiro noshaninkaegi
Anteroniko intiri Joniashi itentagantai-
takenarira karanki yashitakoitakenara.
Iriroegi iketyo kematsaigakeri Kirishito
tekyara nonkematsate naro. Maganiro
iritigankaneegi Kirishito itasanovageiga-
rityo kara ishineventasanoigari.

⁸Pinkantaigakerira aikiro Ampiriato nosuretakari, intitari napigematsatene notasanotarira. ⁹Nosuretakari aikiro Orovano, itentagagakaitari antavageigakenerira Jesokirishito, intiri aikiro notasanotarira Esetaki. ¹⁰Nosuretakari aikiro Apereshi. Irirori yatsipereakovagetakaty kara kantankicha ariompatyo ishintsitanakeri ikematsatanakera. Intiegiri aikiro yonampiigavetarira Arishitovoro nosureigakari. ¹¹Pinkantaigakerira aikiro Eroriano nosuretakari, intitari noshaninka.

Intiegiri aikiro yonampiigavetarira
Narisuso kematsaigiririra Kirishito.
¹²Nosuretakaro aikiro Tiripena ontiri
Tiriposa tavageiginiririra Atinkami.
Nosuretakaro aikiro Perishira atasanoiga-
rira. Ario okañotaka irorori antavagetiniri
Atinkami. ¹³Pinkantaigakerira aikiro Iropo
nosuretakari, irorori ikematsatanovage-
tiri Atinkami. Ario okañotaka iriniro
irorori nosuretsanatokaro, okañotagake-
natari nantinirikatyo ashisanorira otomi.

14Pinkantaigakerira nosureigakari aikiro
Asunkirito, Peregon, Eremeshi, Paterova,
Eremashi, intiegiri aikiro apigematsaegine
tentaigaririra. 15Nosureigakari aikiro
Pirorogo ontiri Joria, intiri aikiro Nereo
ontiri iritsiro. Nosuretakari aikiro Orimpio
intiegiri aikiro maganiri apigematsaegine
tentaigaririra.

16Kametikya pagavakagaigakempa
pishinevakagaigakempara. Maganirosano-
tyo kematsaigiririra Kirishito patoigeiga-
charira ikogaigake pinkemakoigakerira
aiñoegi isureigakempi.

pashini gotagantaigirorira terira
onkañotemparo yogotagaigakempirira
kenkitsatakoigiririra Kirishito. Pinkema-
tsaigakeririka iriroegi oga pinkenaigake
pinkisavakagaiganakempa ovashi
pashirikovakagaiganakempa ganige
pitentavakagaigaa. Garatyo pikonoitu-
maigari. ¹⁸Iriroegi teranika iriro
irantavageigene Atinkami Jesokirishito,
ontityo ipiriniventaigi tatarika oita
ikogageigakerika iriroegi. Iniavageigana-
ketyo kametikya yogaigavetakaro
ovashi yamatavainaiganakeri terira
irogotasanoige.

¹⁹Maganirosanotyo ikemakoigakempi
pikematsatasanoigakera, irorotari
noshineventantaigakempirira naro,
kantankicha nokogake pogotasanoiga-
kera kameti povetsikaigakeroniri
ikogakerira Tasorintsi. Ogari tatarika
oita terira onkametite iroro pinkante
garatyo pisuretumaigaro. ²⁰Pinkañoiga-
kemparika maika, yogari Tasorintsi
igenaneyatyo iragaveakagaigakempi
pagaveaigakeriniri Satanashi. Intitari
Tasorintsi mutakoigajairira agavakagai-
gakempara antimaigakera kameti.
Maika, napigematsaegine, nokogake
inkavintsaavageigakempira Atinkami
Jesokirishito.

²¹Yogari Timoteo notentashitarira nantavageigira ikogake pinkemakoigakerira isureigakempira. Ario ikañoigaka noshaninkaegi Iroshio, Jason intiri Sosupatero isureigakempi. ²²Ario nokañotaka naro nosureigakempi. Nanti papigematsaegine nopaita Tereshio. Narotari tsirinkavakeneririra Pavoro ikantakerira aka sankevantiku.

²³Ikenkiaigakempi aikiro Gayo
nomagimotakerira, irirotari imagimota-
pinigirira maganiro kematsaigatsirira
visapiniigatsirira aka. Ario ikañotaka
Erashito irirori isureigakempi. Inti
tesorero kamagutiririra koriki yapatoigi-

rira timaigatsirira aka ashi inegintetan-taigakemparora itimantaigarira. Intiri aikiro apigematsaegine Koareto ikogake pinkemakoigakerira isureigakempi.

²⁴Maika, napigematsaegine, nokogake inkavintsaaavageigakempira Atinkami Jesokirishito. Ario onkañotakempa. Amen.

Irishineventakenkanira Tasorintsi

²⁵Maikari maika tsame ashineventai-gakemparira Tasorintsi, irirotari gaveankitsine ishintsitagantaigakempirora Niagantsi Kametiri kamantaigakarira tyara ikanta irirori yogavisaakotantira. Irorotari nokenkitsatirira naro nokenkitsatakovagetirira Kirishito. Aikiro irorotari yogikoneatimoigakarira Tasorintsi maika. Irirori igantagatari isariaigakaira pairani okyasano-kyara irogavisaakoigakaera, kantanki-

cha teratyo ogovetenkani. ²⁶Maikari maika iroro ogotantunkani itsirinkakoi-ganakerira pairani kamantantaigatsirira, aikiro okenkitsatakovaetanunkani otsotenkagiteavagetanunkanityo kara inkemaigakeniri maganiro matsigenkaegi kameti iroroniri onkenantakempa inkematsaigakera tovaini inkantaigakerira irogavisaakoi-gakerira, irirotari kantankitsi Tasorintsi onkañotakempara maika. Irirori intitari Tasorintsisanorira terira ineero igamane.

²⁷Irovento maika ikante inkantakanityo irishineventavagetakenkani Tasorintsi panirorira ikanta irirori yogovagetira, irirotyo Jesokirishito neakagaigakerine maganiro arisano paio yavisake ikametivagetakera! Ario onkañotakempa. Amen *Maika intagati, Pavoro*